

KOPONA MWASI YA LIBALA



Babeli bazali mingi. Nakoki kokómela bango nyonso mbala moko te. Kasi, bóyoka.

² Nazali mpenza na esengo ya kozala lisusu awa, na mpokwa oyo, na eyánganelo kitoko oyo, elongo na etongá kitoko ya bato oyo. Ntango tozalaki kokota, kuna, kala mingi te, ezalaki na bato kotelema kuna libanda na balabala koloba ete bakokaki kokota te. Nalobaki: “Ee, ntango mosusu nakoki kozuela bino esika.” Kasi baboyaki kotika bango kokita na nse. Na bongo, nasengi bolimbisi mpo tozangi mpenza bisika ya kofanda mpo na bango. Bayebisaki ngai ete kuna na nse pe bato batóndi. Na bongo, tosenge mpenza bolimbisi mpo na yango. Kasi tozali na esengo ya kozala awa, ná esengo ya komona batei malamú nyonso oyo, bato na mombongo awa, pe bino nyonso boyei kouta na bitúka ndenge na ndenge ya ekólo.

³ Nazuaki litómbe monene na ntongo, ya koteya na ntango ya bilei ya ntongo, pe nasepelaka mingi mpenza kopesamela lokumu ya koloba liboso na bato malamú ya boye. Motó ya liteya na ngai ezalaki: *Mposo Ekosangola Elongo Na Lisango Te*. Nazuaki makoki ya kosilisa yango te. Pe ezalaki libunga ya—ya ndeko te. Amekaki kosenga nzela na moyangeli-esika mpo na kobakisela biso mwa ntango, kasi ye aboyaki. Nasepeli mpenza na yango, Ndeko Demos. Ezali mpenza, mpenza malamú. Na bosolo, natondi moko na moko pe bino nyonso, mpo na boboto na bino. Kasi baboyaki mpenza kopesa biso yango. Na bongo, tosengeleki—tosengelaki kosukisa. Nakozongela yango, mokolo mosusu, mpo na kosilisa yango: *Mposo Ekosangola Elongo Na Lisango Te*. Bososolaki yango, bino baoyo bozalaki awa? [Losambo balobi: “Amen.”—N.D.E.] Nazali kolikia ete yango ekokaki mpenza kososolama.

⁴ Sikawa, nayebi ete na mpokwa oyo, table ronde mosusu pe ekozala, na bongo, naboi kolekisela bino ntango mingi awa mpo bózanga yango te. Mpamba te, nakanisi ete ezalaki mpenza na litómbe mpo na—mpo na baoyo bazali bandimi ya Nkitela, table ronde oyo tomonaki na mpokwa wana. Bato malamú mpenza, biyano malamú mpenza, pe sémba. Esepelisaki ngai mingi mpenza, komona yango. Natii motema ete Nzambe akopambola yango, na mpokwa oyo. Pe bato nyonso bakotala, tika ete bándima. Yango nde libondeli na ngai na bosembo.

⁵ Pe matatoli mingi ekómi lelo, na nzela ya mikanda pe telefone, bato mingi mpenza babikisamaki na liyangani yango. Esepelisaki ngai mingi. Mpo, ezali, kosunga babeli, yango nde mosala na ngai mpenza.

⁶ Na—namataka awa mpo na koteya. Ngai, boyebi, nazali motei te. Kasi ngai, ná eloko oyo, grammair na ngai ya Kentucky, “his, hain’t” pe—pe maloba nyonso wana, na yango na—nakoki koloba te ete nazali oyo babengaka motei ya mikolo oyo. Na—nakoki kozua esika yango te, mpo na—natángá te.

⁷ Kasi nasepelaka mpenza koloba makambo nayebi likolo na Yango, na bato mosusu, to oyo namonaka ete nayebi Yango, epai na bato mosusu, lolenge nayekolaki Yango, oyo Ye azali mpo na ngai. Azali bomoi na ngai mobimba, nyonso nakokaki kokanisa kozala, pe koleka mpenza nyonso nakokaki kokanisa mokolo moko, ete nakozala ata na moninga moko te, mpenza, na mokili ntango nazalaki mwana moke. Kasi nazongisaka mpenza matondi mpo na baninga malamulu lelo.

⁸ Nazali . . . [Ndeko moko alobi: “Kuna na sima bazali koyoka malamulu te, Ndeko Branham. Púsana pembeni.”—N.D.E.] Oh, bólimbisa ngai. Alobi ete na—nazali mpenza koloba mosika na micro.

⁹ Sikawa, mpo na kobanda liteya mbala moko, tótánga biteni ya Makomi. Na—nasepelaka ntango nyonso kotánga Biblia, mpo Ezali Liloba na Nzambe. Nandimaka yango. Pe nandimaka ete Ezali Liloba na Nzambe oyo ekweyaka te. Pe sikawa, nakomaki Makomi mosusu awa, pe makambo mosusu oyo nakobanda kotanga, mpo na ntango moke, ntango mosusu miníti ntukuminei na mitano.

¹⁰ Na sima tokobima na ntango malamulu mpo na kokende kotala lisusu table ronde malamulu na mpokwa oyo. Pe natii motema ete Nzambe akokoba kopambola bino kino na suka. Nayebi likambo bosengeli kosala. Ngai nakozala na mobembo ya kosala lisusu kino Tucson, na mótuca, na mpokwa oyo, bomoni, bongo, bókanisa naino. Ezali mobembo ya ngonga zomi.

¹¹ Nakokende mobembo ngámbo na mai-na-mbu, pe lobi na ntongo nasengeli kondimisa mangwele na ngai ya fievre jaune, na ndako ya bokulaka. Na bongo, na—nasengeli kokende kuna. Mokolo wana, bandimaki koyamba ngai mokolo mosusu na sima, bongo bakondima “te” ete náboya lisusu sikawa. Pe nasengeli lisusu kozwa mángwele ya tetanos ná typhus, pe nyonso mosusu oyo etikali.

¹² Na bongo, nazongisi matondi mingi mpo na libaku malamulu oyo, pe—pe mayangani malamulu oyo tosalaki liboso na likita. Esepelisaki mpeza motema na ngai. Bozali etóngá ya bato malamulu mpenza. Natii motema ete Nzambe akopambola bino.

¹³ Ntango ngonga ya motuya . . . Elima monene wana, oyo azali kuna, oyo auti kobaluka na mpongi, kuna na Alaska, mikolo eleki, atelemisaki lisusu mokila na ye na ntongo ya lelo, zingazinga na Washington. Na bopete nyonso, akoki kotelemisa motó na ngámbo oyo. Pe soki Molimo Mosantu ayebisi ngai polele. . .

14 Moto moko ayanolaki...atunaki ngai boye: “Ekosalema awa, Ndeko Branham?” Te, nayebi eloko moko te. Nayebi eloko moko te, kino nakoyeba mpenza. Ezali solo.

15 Nalingaka ntango nyonso kozala sembo liboso na bino. Naboyaka kobanza-banza, kokotisa likanisi moko, to eloko moko, likambo nandimaka, to likambo ya ndenge wana. Ntango nakoyebisa bino yango, ekosalema. Ee, Asengeli kolobela ngai liboso, na sima nakoyebisa bino. Na—nayebi ete mokili mobimba ezali koningana. Tozali na ntango ya suka. Kasi eloko moko oyo namekaka kozala . . .

16 Na ntongo, Ndeko Shakarian azalaki koloba, ndenge azaláká koleka na milongo ya mabondeli, kokóma kuna pe kozua ba-kálati yango mpo na kotala yango, liboso bato bámata na etumbelo, mpo ma koyeba soki—soki nazalaki koyebisa bango makambo bakomaki kuna. Bato bakomaka makambo ndenge na ndenge na ba-kálati na bango ya mabondeli, boyebi, pe alingaki koyeba soki ezalaki bongo. Alobaki, na ba-kálati nkama likolo na nkama oyo asilaki kotala, ata moko te ezangaki kokokana. [Ndeko Shakarian alobi: “Ata moko te.”—N.D.E.] Ata moko te ekozanga kokokana, bomoni, mpo, soki—soki ezali mpenza Nzambe. Soki ngai moko namikotisi na yango, na ntango wana ekokokana ata moke te mpo na kobanda.

17 Elenge mwasi moko, tata na ye azali awa, azali koyoka ngai sikawa, ayaki epai na ngai, kala mingi te. Alótaki ndoto. Alobaki: “Ndeko Branham, ndoto yango elakisi nini?”

18 Nalobaki: “Nayebi te, ndeko mwasi. Nasengeli koluka koyeba soki Nkolo akolobela ngai yango.” Na bongo, nakendeki pe namekaki kotuna Nkolo, kasi Ayebisaki ngai eloko moko te.

19 Elenge mwasi yango azongaki lisusu. Alobaki: “Ee, olobi nini mpo na ndimbola ya ndoto na ngai?”

20 Nalobaki: “Yaka awa, molingami, fándá naino.” Nalobaki: “Tata ná mama na yo bazali baninga na ngai ya malamú mpenza. Omoni? Bautaki mosika, na Canada, sima na kozua pension, pe bayaki kofanda awa elongo na ngai. Bandimaka likambo oyo, likambo nalingi koloba. Pe nalobá naino likambo moko ya lokuta na moto moko te, na mokáno na ngai, na bomoi na ngai. Soki ngai. . .Nakanisi ete nayebi eloko nini ndoto yango elingi koloba. Kasi soki ngai moko namoni naino ndoto yango te, pe soki Ayebisi ngai te ndimbola na yango, nakoki koyebisa yo te. Omoni, soki nasali likambo na ngai moko, ntango mosusu mokolo moko okosengela na ngai, mpo na likambo ya bomoi to kufa, na ntango wana okoyeba te soki osengeli kondimela ngai to te.”

21 Soki nayebisi bino likambo na Nkombo na Nkolo, ezali mpenza yango. Ye Nde ayebisaki ngai yango. Pe kino lelo, na mibu nyonso oyo, na mokili mobimba, na mokili mobimba, Ebimá lokuta ata mbala moko te. Mpo. . .Pe, sikawa, boyebi

ete moto ya mokili akoki kozanga kokweya bongo te. Esengeli bobele Molimo ya Nzambe mpo na kosala yango.

²² Sikawa, nazali na Nsango oyo nazali na mokumba na yango. Pe mbala mingi, kati na bato, bazuaka ngai, ee, ntango mosusu moto oyo azuaki ntango te ya kofanda pe kokanisa mwa moke, lokola mo—mo, oh, moto mabe, ete nalingaka bato te, mosala na ngai bobele kozokisa bato. Kasi ezali bongo te. Ezali yango te. Nalingaka bato. Kasi, boyebi, bolingo esembolaka.

²³ Soki elenge ya mobali na yo afandi kati kati na balabala, pe olobi: “Mwana na ngai molingami, nalingi te ete ófanda kuna, kasi. . .” Pe mituka ezali koleka mbangu pembeni na ye, pe okotisi ye na ndako. Abimi lisusu mbangu libanda. Ee, osengeli kosembola ye. Soki olingi ye, okosala yango. Osengeli.

²⁴ Soki omoni moto azali kotiólá na ebale na bwato ya moke, kokende na ngámbo ya boéta, wana oyebi ete bwato yango ekozinda ntango ekokóma na boéta, okoloba: “Yoane, yo, ntango mosusu osengeli kokanisa mwa moke, ntango mosusu okolóngá na yo te”? Soki nayebi ete akolóngá te, nakobimisa ye noki noki na bwato yango, ata na makasi, soki ekokoka, mpo bolingo nde esalaka bongo.

²⁵ Pe sikawa, kati na Mateya oyo nateyaka, namekaka ata moke te kokotisa malakisi, to eloko mosusu. Na—nasalaka yango na losambo na ngai moko. Kasi awa, kati na mibali ná basi baoyo bazali na bibongiseli ndenge na ndenge pe makanisi ndenge na ndenge, namekaka bobele kolimbola makambo na lolenge ya kolembisa; kasi ekokaka mpenza mpo ete bino baoyo bobótámi na Molimo ya Nzambe, nandimaka ete bokososola eloko nalingi koloba, kati na baoyo bazali Baklisto, ba-Methodiste, ba-Batiste, ba-Presbiterien, pe bongo na bongo.

²⁶ Sikawa, na mpokwa oyo, nalingi kozua Genese, mokapo ya 24. Nalingi kotánga mo. . . kobanda molongo ya 12 ya mokapo ya 24 ya Genese.

Pe alobaki, E YAWÉ Nzambe. . . nkolo na ngai Abalayama, nabondeli yo, sala ete yango ésalema liboso na ngai lelo oyo pe monisela nkolo na ngai Abalayama motema boboto.

Tala, natelemi awa pene na liziba ya mai, pe bana basi ya bato ya engumba bazali kobima mpo na kotoka mai:

Tika ete moseka oyo nakoloba na ye ete, kitisa mbeki na yo, mpo námela, pe oyo akoloba ete, Melá, pe nakomelisa bakaméla na yo, tika ete ázala mwasi oyo oponi mpo na mosali na yo Yisaka; bongo nakoyeba ete otalisi boboto epai na ngai. . . epai na nkolo na ngai.

²⁷ Na sima, na Buku ya Emoniseli. Ezali ya liboso na Bibila, Genese. Sikawa, na oyo ya suka na Biblia, nalingi kotánga na mokapo ya 21 ya Emoniseli, molongo ya 9.

28 Toyebi likambo Likomi oyo ya Genese elobeli awa . . . Bokoki kotángá mokapo mobimba, soki bolingi. Ezali Nzambe atindaki Eliezer. To, Abalayama atindaki Eliezer, bólimbisa ngai, mpo na koponela Yisaka mwasi ya libala. Pe Rebeka kitoko abimaki, pe ezalaki eyano ebongi be ya libondeli oyo—oyo Eliezer, mosali ya Abalayama, autaki kobondela.

Sikawa, na molongo ya 9 ya mokapo ya 21 ya Emoniseli.

Pe moko na banje nsambo oyo bazalaki na mbeki nsambo oyo etondaki na malози nsambo ya suka ayaki, pe asololaki na ngai, pe alobaki, Yaka awa, pe nakolakisa yo mwasi na libala, mwasi ya Mwana-Mpate.

29 Sikawa nalingi kozua motó ya liteya, na mpokwa oyo, kokokana na yango: *Kopona Mwasi Ya Libala*. Pe oyo ezali, soki ndeko na ngai oyo azali kosala bande awa alingi, oyo ezali bande bokoki kobimisa.

30 Sikawa, likambo oyo, elingi mpenza koloba te ete nazali koloba yango na lobambo oyo awa, kasi ba-bande oyo ekendeke na mokili mobimba. Elimbolamaka, mpenza, oh, na nkóta ebele, ekómaka kino na ba-mboka ya bapakano na mokili mobimba. Totindaka ba-bande yango ofelé, na nzela ya lisangana moko ya losambo. Pe balimbolaka yango. Pe ba-bande yango, ekendeke kino na ba-zamba monene ya Afrika, kino na Inde, pe bisika nyonso na mokili.

Sikawa, kopona Mwasi ya libala!

31 Na makambo mingi ya bomoi, topésamaka makoki ya kopona. Lolenge ya bomoi, yango moko, ezali kopona. Tozali na makoki ya kolanda nzela na biso moko, kopona lolenge biso moko tolingi kobika.

32 Koyekola ezali kopona. Tokoki kopona soki tolingi koyekola, to soki tolingi koyekola te. Ezali kopona oyo tozali na yango.

33 Malamu ná mabe, ezali kopona. Mobali nyonso, mwasi nyonso, elenge mobali pe elenge mwasi, asengeli kopona soki akolinga kobika malamau to kobika malamau te. Ezali kopona.

Kopona ezali likambo monene.

34 Esika okokende ya Seko ezali kopona. Pe ntango mosusu, na mpokwa oyo, bamosusu kati na bino bokopona esika—esika bokolekisa Seko, liboso liyangani oyo ésila na mpokwa oyo. Mbala moko ekoya, oyo, soki oboyaki Nzambe mbala mingi, mbala moko ekoya oyo okoboya Ye mbala ya suka. Ndelo moko ezali, oyo ekaboli mawa ná kosambisama. Pe ezali likambo ya nsómo mpo na mobali to mwasi, elenge mobali to elenge mwasi, kokatisa ndelo yango, mpo okoki lisusu kozonga sima te soki okatisi ndelo yango. Na bongo, na mpokwa oyo, ekoki kozala ntango oyo bato mingi bakozua—bakozua mokano, esika nini bakolekisa Seko na Seko oyo ezangi suka.

³⁵ Tozali pe na kopona mosusu na bomoi na biso, ezali, mozalani ya bomoi. Elenge mobali to elenge mwasi, oyo abandi kokota na bomoi, a—apesameli makoki ya kopona. Elenge mobali akopona. Elenge mwasi azali na makoki ya kondima to koboya yango. Kasi ata bongo, ezali kopona, na ngámbo nyonso mibale. Mobali ná mwasi, bango nyonso mibale bazali na makoki ya kopona.

Ozali pe na kopona moko, lokola Moklisto.

³⁶ Awa na Amerika, kino lelo, bozali na kopona lingomba oyo bolingi kosambela kuna. Ezali litómba na bino, ba-Americanin, kopona lingomba oyo bolingi kozala moko na yango. Ezali kopona. Bosengeli te kokende na moko na yango, soki bolingi na bino te. Kasi soki olingi kolongwa Metodiste pe kokóma Batiste, to kolongwa Katoliko pe kokóma Protestant, pe bongo na bongo, moto moko te akoki koloba na yo to kokotisa yo na lingomba moko boye. Yango ezali—ezali bonsomi na biso. Yango nde democrasia na biso. Moto nyonso akoki kopona mpo na ye moko. Bonsomi ya losambo, pe ezali li—likambo ya motuya. Tika été Nzambe ásungá biso kobatela yango ntango molai mpenza.

³⁷ Bozali pe na kopona moko. Soki . . . Ntango oponi lingomba oyo, okoki kopona soki yo, na lingomba oyo, soki oponi lingomba oyo ekokamba yo esika ya Seko na Seko na yo. Okoki kopona lingomba oyo ezali na endimeli moko, pe ntango mosusu okanisi ete endimeli yango nde olingi. To, lingomba mosusu ezali pe na endimeli na yango.

³⁸ Na sima, ezali pe na Liloba na Nzambe, oyo okoki kopona. Osengeli kopona.

Kati na biso, ezali na mobeko moko oyo ekomami te, ya kopona.

³⁹ Nakanisi, ezalaki Eliya, mokolo moko, likolo na Ngomba Carmel, sima na kowelana esukisaka makambo, na ntango ya matata mpenza, oyo tokokóma na yango sikawa. Ntango mosusu, ekokómela ngai to yo, na mpokwa oyo, ete tókoka kopona, lokola likambo esalemaki na Ngomba Carmel. Ya solo mpenza, nakanisi ete ekosalema sikawa, na mokili mobimba. Kasi etikali moke ntango moko ekoya, oyo okosengela kopona.

⁴⁰ Pe bino, mibali oyo bozali awa, bato ya mangomba ya bibongiseli, bóndima likambo oyo, ete ntango ekoki mpo na bino, ntango oyo bosengeli kopona. To bokokóta na Lisangana ya Mokili, to bokozala lisusu ebongiseli te. Ekosengela na bino kosala yango, pe kopona yango ekosalema kala mingi te.

⁴¹ Pe, kozela kino ngonga ya suka ezali pe likámá, mpo okoki kotiáma eloko oyo okokoka lisusu kokabwana na yango ata moke te. Boyebi, ezali na ntango moko oyo bakoki kokebisa yo, na sima, soki okatisi ndelo wana ya likebisi, na ntango wana, osili kotiáma elembo na ngámbo mosusu, elembo ya libela.

42 Bómikanisela, ntango obu ya yubilé ezalaki kokoka, nganganzambe azalaki likolo na mpunda koyúla keleló, ete moombo nyonso akoki kokóma nsomi. Kasi ye oyo aboyaki kondima bonsomi na ye, na boye basengelaki komema ye na tempelo, na likonzi moko, pe bazalaki kotobola ye litoi na motongá, na sima asengelaki kosalela nkolo na ye mpo na libela. Bazalaki kotia ye yango na litoi lokola etaliseli ya koyoka. “Kondima eutaka na koyoka.” Ayokaki keleló yango, kasi aboyaki kotosa yango.

43 Pe mbala mingi, mibali ná basi bayokaka Solo ya Nzambe, pe bamonaka Yango kotatolama pe kotalisama polele, Solo, kasi ata bongo, baboyaka koyoka Yango. Bamilóngisaka na lolenge moko to mosusu. Baponaka eloko mosusu, esika ya kondima Solo pe makambo polele, yango wana matoi na bango ekoki kokangama na Nsango-malamu. Bakoyoka Yango lisusu te. Toli na ngai mpo bino ezali ete soki Nzambe alobi na motema na yo, sálá yango mbala moko.

44 Eliya apesaki bango makoki ya kopona eloko balingaki: “Bino moko bópona lelo nani bokosalela. Soki Nzambe azali Nzambe, bósalela Ye. Kasi soki Baala azali Nzambe, bósalela ye.”

45 Sikawa, ndenge tozali komona, makambo nyonso ya mokili etalisaka makambo ya molimo, ndenge toyekolaki na liteya na biso ya ntongo oyo, lokola moi ná lolenge na yango. Yango nde ezalaki Biblia na ngai ya liboso. Liboso nátánga lokasa moko na Biblia, nayebaki Nzambe. Mpamba te, Biblia ekomami bisika nyonso na mokili, pe elongobani mpenza na Liloba na Nzambe: lokola kufa, kokundama, kosekwa ya makambo ya mokili; pe ndenge moi ebimaka, elekaka, eláláka, ekufaka, esekwaka. Ezali na makambo mingi mpenza oyo tokoki kotalisa na bililingi, Nzambe kati na makambo ya mokili, kasi tosengeli kotia yango pembeni, mpo na Liteya oyo.

46 Sikawa, soki makambo ya molimo, to, makambo ya mokili ezali etaliseli ya makambo ya molimo, na bongo, kopona mwasi ya libala, na mokili, ezali etaliseli ya kopona Mwasi, Mwasi ya libala, na molimo.

47 Sikawa, ezali likambo ya eyongi mingi, ntango tolingaka kopona mwasi, mpo na mobali, mpo ba-ndayi yango ezali kino liwa ekokabola biso. Tosengeli kobátela yango ndenge wana. Pe bozali kosala ndayi yango liboso na Nzambe, ete bobele liwa nde ekokabola bino. Nakanisi ete tosengeli. . . Mobali oyo azali kokanisa malamumu, oyo azali kokanisa bolamu ekoya ya bomoi na ye, asengeli kopona mwasi yango na bokebi nyonso mpenza. Bókéba mpenza na likambo bozali kosala. Pe mwasi oyo azali kopona mobali, to azali kondima kopona ya mobali, asengeli kokéba mingi mpenza na likambo azali kosala, pe koleka mingi

na mikolo oyo. Mobali asengeli kokanisa pe kobondela liboso ya kopona mwasi.

⁴⁸ Nakanisi ete, lelo, ntina mpenza oyo mabala mingi ezali kokufa sikawa, pe biso, na Amerika, tozali ekólo ya liboso na mokili mobimba, na makambo ya koboma libala. Tozali ekólo ya liboso na mokili mobimba. Mabala ezali kokufa mingi awa, na ekólo oyo, koleka bisika nyonso mosusu, pe biso tosengélaki kozala pe tomónanaka lokola ekólo ya Baklisto. Ezali mpamela monene, ba-tribunal na biso ya koboma mabala! Nakanisi, ntina na yango ezali ete mibali batángwe mosika na Nzambe, basi pe batángwe mosika na Nzambe.

⁴⁹ Tomoni ete, soki mobali abondelaki pe mwasi abondelaki mpo na yango; kozanga kotala miso ya kitoko, to mapeka yango ya mbinga, makambo ya ndenge wana, to likambo mosusu ya mposa ya mokili; kasi soki bataleli liboso Nzambe, pe balobi: “E Nzambe, oyo nde mwango na Yo?”

⁵⁰ Namoni ete lelo, ko-tricher ekómi mingi, lokola na ba-kelasi, ndakisa. Ntango—ntango bana balekaka pembeni na ndako na ngai, na ntongo, bana mingi ya bazalani, ba—bazali bancinga na ngai, balekaka pe balobaka: “Ndeko Branham, okoki kobondela mpo na biso? Tozali na—na momekano ya kelasi lelo. Natángaki mingi butu mobimba, kasi nandimi te ete nakoki—nakoki kolonga. Bóndela mpo na ngai.” Nakanisi ete mwana nyonso ya kelasi, soki olingi, soki . . . Elongo ná baboti na mésa na ntongo, bokoki koloba: “Mama, Yoane azali na momekano ya kelasi lelo. Tóbondela mpo na ye sikawa.” Nakanisi ete ekoleka makambo nyonso mosusu bokoki kosala ndenge mosusu, esika ya kobwaka miso na lokasa ya moninga mpo na ko-tricher. Nakanisi ete bosengeli kolobela yango pe kobondela mpo na yango.

⁵¹ Pe soki toyekolaka likambo tosalaka ntango tolingaka kobala, ntango toponaka mwasi na biso, mobali na biso, soki tokoki koyekola yango malamau! Mobali asengeli kobondela na etingia nyonso, mpo akoki kobebisa bomoi na ye mobimba. Bókanisa naino, ndayi yango ezali “kino liwa ekokabola biso”, pe akoki kobebisa bomoi na ye soki aponi mabe. Kasi soki ayebi yango, aponi mabe pe abali mwasi oyo alóngóbani kozala mwasi na ye te, pe ata bongo, asali yango, wana ezali libunga na ye. Soki yo mwasi ondimi mobali oyo oyebi ete alóngóbani kozala mobali na yo te, wana ezali libunga na yo moko, sima na yo koyeba malamau ná mabe. Na bongo, bosengeli kosala yango te soki bobondeli te kino kozua eyano.

⁵² Ezali pe motindo moko mpo na kopona losambo. Sikawa, bosengeli kobondela mpo na losambo bolingi kosangana na yango. Bomikanisela, ba-losambo ezalaka na milimo.

⁵³ Sikawa, nalingi kopámela moto te. Kasi namoni ete nakómi mokóló, pe moko na mikolo oyo, nasengeli kokende. Pe nasengeli

koyanola na Mokolo ya Kosambisama, mpo na makambo nakoloba na mpokwa oyo to na ntango mosusu. Pe yango wana ngai nasengeli kosala makambo na eyongi nyonso pe kondimisama mpenza.

⁵⁴ Kasi, soki okei na losambo, pe otali malamumu bizaleli ya losambo yango, tala malamumu mokengeli mwa moke, mbala mingi okomona ete losambo esalaka makambo lokola mokengeli. Mbala mosusu, namitunaka soki tozuaka milimo moko na mosusu te, esika ya Molimo Mosantu. Soki okei esika oyo mokengeli azuaka se ngámbo moko ya makambo pe akobaka bongo, okomona ete losambo esalaka motindo moko. Nakoki komema bino na losambo oyo namonaka mokengeli kotelema, koningisa motó liboso pe sima. Soki otali losambo malamumu, basalaka likambo yango moko. Soki bozui mokengeli oyo andimaka makambo nyonso, mbala mingi losambo ekosala likambo yango moko. Na bongo, soki nasengelaki kopona losambo, nalingaki kopona ya solosolo, lokola ya ebandeli, ya Litondi ya Nsango-malamumu, losambo ya Biblia, soki nasengelaki kopona losambo mpo na komema libota na ngai. Poná. Natalaki . . .

⁵⁵ Mokolo moko, bana mibali, mwana ya Ndeko Shakarian ná bokiló na ye bamemaki ngai awa mpo na kobondela mpo na elenge mobali moko, moyembi, elenge mobali ya kokamwa. Nautaki . . . Fred Barker, nde nkombo na ye, nautaki mobembo. Babengaki ngai pe balobaki ete “Fred azali kobunda na liwa”. Na sima, liboso nákokoka kokota na ndako yango, nsango mosusu eyaki: “Ntango mosusu asili kokufa sikawa.” Balobaki ete asalaki he—hemorragie na bongó, pe akómaki paralizé, pe—pe azalaki kobunda na liwa, pe mwasi na ye alingaki nábondela mpo na mobali na ye.

⁵⁶ Namilobelaki: “Oh, soki nameki kozua mpépo, akokufa liboso nákóma kuna, pe ntango mosusu asili kokufa sikawa.” Na bongo, nabengaki nokinoki pe nazuaki elenge mwasi yango na telephone. Pe—pe tozalaki koloba na litoi ya Fred na nzela ya telephone. Azalaki kokoka komela eloko te. Bakómaki koleisa ye na nzela ya sónde. Pe ntango tobondelaki mpo na ye, alobaki, na nzela na bilembo, ete bálóngola ye yango na mongongo. Akokáki komela eloko. Minganga bandimaki yango te. Balongolaki yango, pe akokáki komela eloko. Mokolo mosusu, afandaki ye moko malamumu.

Lingomba; kopona lingomba.

⁵⁷ Kala mingi te, bauti kobenga ngai na telephone. Na ntongo ya lelo, mondimi moko na losambo na ngai, azali mpenza mo-Batiste ya mwasi, ya Louisville, akufaki lelo na ntongo-ntongo. Pe losambo na ngai kuna, etóna ya bato oyo bamípesa mpenza, basanganaki elongo pe bakendeki kuna, liboso bátia ye na ndako-ya-malili, bazalaki zinga-zinga na ye, babondelaki kino

bomoi ezongaki kati na ye. Pe azali na bomoi na mpokwa oyo. Ba-mpaka ya losambo na ngai, mpo, batéyáma kondima ete nyonso ekoki kosalema, babélémaki na Nzambe na bosembo.

Na bongo, bosengeli kopona malamamu.

⁵⁸ Lisusu, lolenge ya mwasi oyo mobali akopona, ekotalisa mposa pe ezaleli na ye. Soki mobali aponi mwasi ya mabe, etalisaka ezaleli na ye. Pe eloko oyo amikangi na yango, ezali kotalisa mpenza eloko nini ezali kati na ye. Mwasi azali kotalisa eloko nini ezali kati na mobali oyo aponi ye lokola mwasi. Etalisaka eloko nini mpenza ezali kati na ye. Ata azali koloba nini na libanda, bótala eloko nini abali.

⁵⁹ Soki nakei esika ya mosala ya moto moko, pe alobi ete azali Moklisto; bililingi ndenge na ndenge na bitutú, azali koyoka mizíki ya boogie-woogie. Nazali na ntina ya maloba na ye te. Nakondima litatoli na ye te, mpo molimo na ye ezali koleisama na makambo yango ya mokili. Bongo soki pe abali mwasi oyo abínaka na bar, to, soki abali mwasi ya ndumba, to mwasi-ya-pité kitoko ya mikolo oyo? Ezali kotalisa polele. Ezali kotalisa eloko nini ezali na makanisi na ye, ndenge nini libota na ye ekozala, mpo azuaki ye mpo na kobokolo bana na ye. Pe akobokolo bana yango bobele ndenge ye azali. Na bongo, ezali kotalisa eloko nini ezali kati na mobali yango. Mobali oyo azui mwasi ya ndenge wana, azali kotalisa mpenza makanisi na ye mpo na mibu-ekoya-sima.

⁶⁰ Bokoki kokanisa Moklisto kosala likambo ya ndenge wana? Te, misie. Ngai nakoki te. Moklisto ya solosolo akoluka basi ya bonzénga wana te, baoyo babínaka na bar, pe basi-ya-pité. Akoluka ezaleli ya Moklisto.

⁶¹ Sikawa, okoki kozua makambo nyonso te. Ekoki kozala na mwana mwasi moko oyo azali kitoko mpenza. Pe mwana mwasi mosusu, ntango mosusu azali na ye. . . lolenge na ye ekoki kozala malamamu koleka oyo mosusu. Pe osengeli ntango mosusu kotika moko mpo na mosusu, kasi, soki azali na lolenge ya mwasi mpenza te, ya mwasi te. Pe, ye. . . Ezali na ntina te soki azali kitoko to te. Ezali malamamu koleka kotala ezaleli na ye, ázala kitoko to kitoko te.

⁶² Sikawa, likambo ya malamamu ezali, soki Moklisto alingi kopona mwasi, asengeli kopona mwasi ya solosolo, oyo abótámá mbala mibale, ata azali ndenge nini. Oyo ye azali, yango nde ezali kosala ye. Na sima, lisusu, ezali kotalisa polele ezaleli ya bulee na ye moko, pe ezali kotalisa eloko nini ezali na makanisi na ye pe likambo nini ekosalema na mibu-ekoya-sima, mpo mwasi yango nde akobókolo libota na ye, mpo na miango mikoya-sima na ndako na ye.

⁶³ Soki abali moko na ba-ricketta ya mikolo oyo, basi ya pité, akozela eloko nini? Mobali yango akozela kozua libota ya ndenge nini? Soki abali elenge mwasi oyo azangi mpenza bomoto ya

kotikala na ndako pe kotala makambo ya ndako, kasi alingaka kosala mosala libanda, esika ya moto moko, akozala mama-ya-ndako ya ndenge nini? Bokoza bana-basi-ya-mosala pe nyonso wana. Ya solo.

⁶⁴ Sikawa, nasepelaka mpenza na lolenge ya bato ya mikolo oyo te, ya basi basálaka. Ntango namónaka basi oyo balátaka bilamba ya polisi, kotambola-tambola na engumba oyo na bamotó, lokola polisi, ezali nsoni mpo na engumba nyonso oyo ekopesa nzela na mwasi kosala yango. Bomoni? Bomoni? Na ntango oyo mibali mingi bazangi mosala, ezali kotalisa lolenge ya kokanisa ya mikolo oyo na engumba na biso. Ezali kotalisa libebi. Tosengeli kotinda basi yango kuna ndenge wana te. Bazali na likambo ya kosala kuna te, ndenge wana.

⁶⁵ Ntango Nzambe apesaki mobali mwasi, Apesaki ye eloko ya malam koleka oyo Akokaki kopesa ye, libanda na lobiko. Kasi ntango mwasi abandi koluka kozua esika ya mobali, ntango wana, azali kokóma eloko ya mabe koleka oyo mobali akoki kozala na yango. Sikawa, ezali solo. Bomoni?

Sikawa tokoki komona ngámbo na yango na molimo.

⁶⁶ Na—nayebi ete ezali mabe, bomoni ete ezali mabe, kasi ezali Solo. Ata tomoni yango mabe ndenge nini, tosengeli kondima makambo yango ndenge wana. Yango nde Biblia ezali kolakisa. Bomoni?

⁶⁷ Sikawa, tomoni awa polele mwango ya molimo, mwango ya Nzambe mpo na Efandelo na Ye ya mikolo-mikoya elongo na Mwasi na Ye ya libala ya mikolo-mikoya, komonana polele sikawa.

⁶⁸ Soki mobali abali mwasi-ya-pité, bomoni eloko nini azali koluka mpo na mikolo-mikoya. Soki mobali abali mwasi oyo alingaka kofanda na ndako te, bomoni eloko nini azali koluka mpo na mikolo-mikoya. Mokolo moko ngai. . .

⁶⁹ Likambo oyo ekoki kobangisa. Nayoki été nalobela yango. Pe na—na, mbala mingi, soki nayoki kolobela likambo, nasengeli kolobela yango. Pe mbala mingi, ezalaka lolenge ya Nzambe.

⁷⁰ Na—nazaláká kokende elongo na mobókoli bibwéle moko, tozaláká kosala elongo, mpo na kosomba ba-ngombe. Pe namonaki ete mobangé ya moto yango azalaki ntango nyonso kotala elenge ya ngombe-mwasi na miso liboso ándima kokakola yango. Na sima, azalaki kobalola motó na yango, pe kotala-tala yango. Nazalaki kolanda ye, kolandela ye. Azalaki kotala-tala yango likolo kino na nse, soki ezalaki na lolenge ya malam. Na sima, azalaki kobaluka pe kotala yango na miso, pe mbala mosusu azalaki koningisa motó pe koleka na ye.

Nalobaki: “Jeff, nalingi kotuna yo likambo moko.”

alobaki: “Lobá, Bill.”

71 Nalobaki: “Mpo na nini ozali ntango nyonso kotala ngombe yango na miso?” Nalobaki: “Ezali komonana ngombe malamumu—malamu pe monene.”

72 Alobaki: “Tika náyebisa yo, mwana, ozali na makambo mingi ya koyekola.” Pe na—nasosolaki yango ntango ayebisaki ngai. Alobaki: “Ata ezali monene ndenge nini, ezali na ntina te. Ata ezali na misuni kino na litíndí. Kasi soki ezali na miso wana ya nkanza, komeka kosomba yango ata moke te.”

Nalobaki: “Mpo na nini bongo, Jeff?”

73 “Ee,” alobaki, “likambo ya liboso,” alobaki, “ekobanda kofanda esika moko te.” Pe alobaki: “Ya mibale, ekotikala kozala mama mpo na bana na yango te.” Pe alobaki: “Sikawa, batiaki yango kati na lopángo, yango wana ekómi monene. Soki okangoli yango, ná miso ya nkanza wana, ekopota mbangu kino liwa.”

74 Nalobaki: “Oyebi, namoni ete nayekoli likambo moko. Nandimi ete ezali pe bongo mpo na basi.” Ya solo. Ya solo.

75 Miso wana ya nkanza, ya nsomo, ya ricketta, ekozala malamumu kozala mosika na ye, mwana, ná bipakola-pakola nyonso ya langi ya bleu oyo amitieli na miso na ye. Pe ngai. . .ngai nalingaka yango te. Nandimi te ete ezali malamumu mpo na mwasi-Moklisto. Ata ba-televizió pe ba-zulunále elobi boni ete ezali kitoko. Ezali eloko ya nsomo pe mabe koleka nyonso oyo namóná na bomoi na ngai.

76 Ntango namonaki yango mbala ya liboso, awa na Cafeteria Clifton, na ntongo moko, na kolia bilei-ya-ntongo. Namonaki bilenge basi yango koya. Ndeko Arganbright autaki kokóma, ngai pe. Autaki kokita na nse. Namonaki elenge mwasi moko kokota. Namilobelaki: “Ee, na—na—na—nayebi te.” Namónáká yango naino liboso te. Ezalaki ndenge mosusu. Oh, ezalaki lokola azalaki kopola, boyebi, azalaki mpenza nsomo na kotala. Nazali koloba yango te mpo na kosekisa. Na—nazali koloba yango. Boyebi, nasila komóná maladi ya mbála. Nazali ntóma. Nasila komóná lolenge nyonso ya bilongi ebébisámá, boyebi, oyo euti na bokono. Nalingaki kotelema pe kokende epai ya elenge mwasi yango mpo na koyebisa ye: “Na—na—nazali motei. Na—nabondelaka mpo na babeli. Oko—okolinga ete nábondela mpo na yo?” Namónáká naino eloko ya ndenge wana te. Na sima, mibale to misato mosusu bakotaki. Na bongo, nazongaki mwa moke sima pe nazelaki.

77 Ndeko Arganbright ayaki, bongo, nalobaki: “Ndeko Arganbright?” Akoki kozala awa. Nalobaki: “Likambo nini ekómeli mwasi wana?” Bomoni?

Alobaki: “Oyo wana, ezali kopakola-pakola.”

78 Nalobaki: “Ee, oh! la la! la la!” Bomoni? Namilobelaki ete basengelaki komema ye esika moko na ndako ya bato ya bokono

ya mába, boyebi, mpo na kopekisa été eloko yango ekómela basi mosusu nyonso.

⁷⁹ Kasi, boyebi, bosengeli kolengela makambo, kotala, kobondela, ntango bozali kopona. Mpo, tomoni, na likambo oyo, Liloba ya elaka. Ye, mwasi na libala oyo mobali akopona, akotalisa polele ezaleli ya mobali. Akotalisa eloko nini ezali kati na ye.

⁸⁰ Sikawa, bokoki kokanisa mobali oyo atondi na Molimo Mosantu kozua eloko ya ndenge wana lokola mwasi na ye? [Losambo balobi: “Te.”—N.D.E.] Na—na—nandimi yango te, ndeko. Sikawa, ntango mosusu ngai nazali mpenza mobangé. Kasi, boyebi, na—nakoki mpenza kososola yango te, bomoni, botala, mpo ekotalisa eloko nini ezali kati na ye. Mwasi nde akosunga ye mpo na kosála libota na ye na mikolo-mikoya.

⁸¹ Sikawa, na boye, soki tozóngi sikawa mwa moke na ngámbo ya molimo. Soki bomoni lingomba oyo ezali na mokili, kosala makambo lokola mokili, kosepela na mokili, kosangana na mokili, komona Mibeko ya Nzambe lokola Ye nde akomá Yango te, na bongo, bo—bokoki kososola ete Klisto akozua Mwasi na libala ya ndenge wana te. Bokoki kokanisa, kozua lingomba ya mikolo oyo lelo lokola Mwasi na libala? Nkolo na ngai te. Ngai . . . Nakondima yango ata moke te. Te. Sikawa, bóbosana te, mobali ná mwasi na ye bazali moko. Okosangana nde na moto ya ndenge wana? Soki osali yango, ekolembisa mpenza kondima na ngai mpo na yo.

⁸² Na bongo, bokanisi ete Nzambe Ye moko akosangana na eloko ya ndenge wana, mwasi ya ndumba mpenza ya ebongiseli? Bokanisi ete Akosala yango, “Bazali na lolenge ya kosambela nde bazali koangana nguya na yango”? Akosala yango ata moke te. Mwasi-na-libala asengeli kozala na ezaleli na Ye kati na ye. Lingomba ya solosolo, oyo ebotami mpenza mbala ya mibale, esengeli kozala na e—ezaleli oyo ezalaki kati na Klisto, mpo mobali ná mwasi bazali moko. Soki Yesu azalaki kosala bobele makambo mazalaki kosepelisa Nzambe, kotósa Liloba na Ye pe kotalisa Liloba na Ye, ekosengela na Mwasi na Ye kozala na lolenge moko ya ezaleli. Akoki ata moke te kozala ebongiseli. Mpo ete, na bongo, ata olingi koloba “te,” ndenge nini, akonzami esika moko na likita moko, oyo ekoyebisa ye makambo asengeli kosala pe makambo akoki kosala te, pe, mbala mingi, ezalaka na ba-milió na kilometele mosika na Liloba ya solo.

⁸³ Ezali mpenza mawa ndenge tokendeke mpenza mosika na Mokambi ya solo, oyo Nzambe atíkélá biso mpo na kokamba Lingomba. Atindaki bakengeli-bakonzi ya etúka ata moke te. Atindaki ata moke te ba-episkopo, ba-cardinal, ba-sángó, ba-pápa. Atindaki Molimo Mosantu mpo na Lingomba, mpo na kokamba Lingomba. “Ntango Ye Molimo Mosantu akoya, Akokamba bino na Solo nyonso, Akomonisela bino makambo

oyo, makambo Nayebisaki bino, Akokanisela bino yango, pe Akolakisa bino makambo masengeli koya.” Molimo Mosantu asengelaki kosala yango. Sikawa, lingomba ya mikolo oyo eyinaka Yango. Balingaka Yango te, bongo, ndenge nini akoki kozala Mwasi-na-libala ya Klisto? Bato ya lelo bazali kopona ebongiseli ya mikolo oyo. Makambo esalaka, etalisaka bobele lisososi mabe na bango ya Liloba.

⁸⁴ Nazali na mposa ya kozokisa te, kasi nalingi kotika yango kokóta na bozindo mpenza kino bókoka komona yango.

⁸⁵ Nabálísá babálani mingi, kasi ekaniselaka ngai ntango nyonso Klisto ná Mwasi-na-libala na Ye. Moko na mabála nasíla kobalisa awa, kala mingi te, e—ezalaki likambo moko ya kokamwisa na bomoi na ngai. Esili koleka mibu mingi, ntango nazalaki naino elenge motei.

⁸⁶ Ndeko na ngai ya mobali azalaki kosala na—na Misala Ya Kotonga Ya Letá. Nayebi te soki moto moko azali lisusu komikanisela yango, to te, moto ya mobangé lokola ngai. Ezalaki mwa—mwango moko bokulaka azalaki na yango. Pe ndeko na ngai azalaki kosala kuna, pene na kilometele ntuku minei na mwambe. Bazalaki kotímola ba-láki, ezalaki mwango ya kobatela bozalisi.

⁸⁷ Pe ezalaki na mwana mobali moko kuna oyo azalaki kosala, elongo na ye, autaki na Indianapolis, pene na kilometele, oh, mokama na ntuku motoba likolo na ngambo ya Jeffersonville, esika na—nafandaka, to nazalaki kofanda. Pe ezalaki na... Mokolo moko, alobaki na ndeko na ngai, alobaki: “Doc,” alobaki, “na—nalingi... Nalingi kobala, soki nakoki kozua mbongo esengeli mpo na kofuta motei.” Alobaki: “Na—nazali na mbongo esengeli mpo na kofuta mokanda-ya-letá, kasi,” alobaki, “nazangi mbongo esengeli mpo na kofuta motei.”

⁸⁸ Doc alobaki: “Ee, ndeko na ngai azali motei, pe—pe ye—pe akoki kobalisa yo.” Alobaki: “Afutisaka bato mbongo ata moke te mpo na makambo ya ndenge wana.”

Alobaki: “Okoki kotuna ye soki akoki kobalisa ngai?”

⁸⁹ Ee, na mpokwa yango ndeko na ngai atunaki ngai. Nalobaki: “Soki abálá naino te liboso, moko to mosusu na bango mibale, pe bango... makambo nyonso ezali malamú.”

Alobaki: “Ee, iyo, nakotuna ye.”

Pe nalobaki: “Soki ezali bongo, yebisa ye ete akoki koya.”

⁹⁰ Na bongo, ntango mokolo ya poso ekokaki, elenge mobali yango ayaki. Ezalaka ntango nyonso likambo monene mpo na ngai, ntango nakanisaka likambo yango. Ngai... Ezalaki sima ya nzanga, mbula ebetaki, Chevrolet moko ya kala, mínda ya liboso bakangá yango na bibendé, etelemaki liboso na ndako. Ezalaki ntango moke, sima na liwa ya mwasi na ngai, nazalaki

kobíka lokola monzemba, na ndako moke ya biteni mibale. Pe—pe Doc azalaki kuna elongo na ngai, kozela bango.

⁹¹ Pe—pe elenge mobali moko abimaki na motuka, pe azalaki mpenza lokola mobali ya libala te, mpo na ngai, to mpo na moto nyonso, nabanzi. Iyo. Nakokaki kolata . . . kosomba sapato ya mwa malamumu, na dollar moko na ndambo. Ye alataki sapato moko, esíla kobeba. Pe pantalon na ye ezalaki mpenza mulàlà. Pe alataki kazaka moko ya kala ya velours ya coton. Nayebi te soki bato bakóli kati na bino bakoki koyeba yango lisusu. Ezalaki lokola elekisamaki na masíni ya kosukola bilamba kasi batelisaki yango te, ezalaki na ba-nzela-nzela, ekangámá *boye*, nsónge ematá likolo.

⁹² Pe e—elenge mwasi moko abimaki na ngámbo mosusu, alataki mwa, oh, mwa robe moko ya karé-karé.

⁹³ Nayebi te. Mokolo moko nasalaki libunga ya koloba nkombo ya elamba yango. Vichy, nabanzi ebéngamaka bongo. Na bongo, ezalaki . . . [Losambo baseki—N.D.E.] Nalobi yango lisusu mabe. Na—nabosanaka yango ntango nyonso. Pe nalobaki . . .

⁹⁴ Abimaki na motuka, pe bamatáki na bibuteli. Pe—pe ntango bakotaki, mwana mwasi ya bato, ye . . . Nabanzi ete ye, alataki eloko mosusu te, bobele jupe. Azalaki ata na sapato mpenza te. Asengaki nzela na motuka pe bamemaki ye ofelé longwa na Indianapolis. Suki na ye ekitaki na mokongo, akangisaki suki ya milai pe ekitaki na mokongo na ye. Azalaki komonana mwana elenge mpenza.

Nalobaki na ye: “Ozali na mibu esengeli mpo na kobála?”

⁹⁵ Alobaki: “Iyo, misie.” Pe alobaki: “Napesami nzela na mokanda longwa na tata ná mama na ngai.” Alobaki: “Nasengelaki kolakisa yango awa na—na tribunal, mpo na kozua certificat na ngai.”

⁹⁶ Nalobaki: “Malamu.” Nalobaki: “Nakosepela kosolola na bino mwa moke, liboso ya kosála milúlú ya libala oyo.” Bafandaki. Elenge mobali azalaki kotálatala na ndako mobimba; esengelaki mpenza ákatama suki. Akobaki kotalatala na ndako mobimba. Azalaki koyoka ngai te. Nalobaki: “Mwana, nalingi ete óyoka makambo nazali koloba.”

Alobaki: “Iyo, misie.”

Pe nalobaki: “Olingi elenge mwasi oyo?”

Alobaki: “Iyo, misie. Nalingi ye.”

Nalobaki: “Bongo yo, olingi ye?”

“Iyo, misie. Nalingi ye.”

⁹⁷ Nalobaki: “Sikawa, ozali na esika ya komema ye sima na kobálana?”

Alobaki: “Iyo, misie.”

98 Nalobaki: “Malamu. Sikawa,” nalobaki, “nalingi kotuna yo likambo moko. Soki nasosoli malamu, osalaka awa, na Misala ya Kotonga ya Letá.”

Alobaki: “Iyo, misie.” Ezalaki pene na dollar zomi na mibale na mpóso moko.

Nalobaki: “Okanisi ete okoki kokokisa ba-mposa na ye?”

Alobaki: “Nakosala nyonso nakoki kosala.”

99 Nalobaki: “Ee, ezali malamu.” Pe nalobaki: “Sikawa, okosala nini soki alongolami. . . Okosali nini soki balongoli ye na mosala oyo, ndeko mwasi? Okosala nini, okozonga mbangu na ndako, epai ya mama ná papa?”

Alobaki: “Te, misie. Nakotikala elongo na ye.”

100 Pe nalobaki: “Bongo yo, misie, soki bobóti bana misato to minei, bozangi makoki ya koleisa bango, pe ozali na mosala te. Okosala nini, okobengana ye?”

101 Alobaki: “Te, misie. Nakokoba kobunda. Tokolukaluka na ndenge nyonso.”

102 Namimonaki moke. Namonaki ete mobali alingaki mpenza mwasi, pe balinganaki. Nabalisaki bango.

103 Na sima, namitunaki esika nini amemaki mwasi ye. Sima na mwa mikolo, natunaki ndeko na ngai Doc esika yango. Alobaki: “Kitá na New Albany”, engumba moko ya moke na nse na biso.

104 Kuna na mai, esika natiáká eteni ya linzanza moko, esika nazalaki kokende mikolo nyonso, ntango na—ntango nazalaki kosala mosala ya kotia ba-singa ya telefone. Na bongo, ntango bato mosusu bazalaki kofanda elongo, kobeta masolo ya maseki pe nyonso wana, ngai nazalaki komata na motuka pe kokende mbangu na mai mpo na kobondela na ntango yango. . . ? . . . Pe kotánga Biblia na ngai, na nse ya eteni moko monene ya linzanza, esika kompani ya kosala bibende ezaláká. Ezalaka na ebélé ya ba-wagon ya kala kuna.

105 Elenge mobali yango akendeki kuna, azuaki wagon moko kuna pe amisalelaki ekuke. Azuaki nkasa ya zulunále ná ba-bouton-punaise.

106 Bato boni bayebi bouton-punaise? Boye, moto moko te ya Kentucky azali awa. Ezali, soki ozui eteni ya carton, otúbí yango bouton-punaise, mwa nsete. Na sima okangisi yango na. . . Yango nde bouton-punaise.

107 Na bongo, batiaki yango bisika nyonso. Pe akendeki kozua bisalelo na kompani ya bibende, pe asalaki ebuteli mpo na komata. Azuaki ba-sandúku ya kala, pe asalaki mesa. Mokolo moko, namilobelaki: “Nakokende kotala soki bazali ndenge nini.”

108 Pene na sanza motoba liboso na yango, nabalisaki mwana-mwasi ya E. V. Knight ná mwana-mobali ya E. T. Slider.

E. V. Knight, moko na bato ya mbongo mingi koleka, na Ebale ya Ohio, pe, oh, azali mokonzi na ba-kompani minene kuna, oyo etongaka ba-ndako esilá kosalema, pe bongo na bongo. Pe—pe Slider, E. T. Slider, ye, ezali kompani ya zelo ná mabanga ya mike, bana ya bato ya mbongo mingi mpenza. Pe nabalisaki bango.

¹⁰⁹ Nakendeki esika moko, toyekolaki ndenge tokosala, pene na mposo mibale mobimba, kokota na ndako moko ya moke mpenza pe kofukama likolo na coussin. Milúlú ya ndenge nyonso pe makambo nyonso nasengelaki kotósa, nasengelaki kotósa yango, mpo na kobalisa ba-bálani wana! Pe ntango bakendeki, ee, bazalaki. . . Ba-bálani mosusu wana bazalaki bobele kuna, na chambre moko moke, esika tozalaki na mwa kiti ya bisika misato ná mbeto egúmbamaka, kasi mabála nyonso mibale esalemaki na milúlú ya motindo moko.

¹¹⁰ Na bongo, mokolo moko, nakanisaki kokende kotala ba-bálani oyo ya bazui. Bazalaki na ntina ya kosala mosala te, ba-tata na bango bazalaki bato ya mbongo mingi mpenza, batongelaki bango ndako ya kitoko. Na bosolo, moto oyo E. V. Knight, kuna likolo ya ngomba, bisímbeli-bikuke ya ndako na ye ya monene esálémá na ba-kará zomi na minei, boye, bokoki kokanisa lolenge nini ya ndako bazali kofanda na yango. Bazalaki na ntina ya kosala mosala te. Bazalaki kopesa bango motuka ya Cadillac ya kitoko mibu nyonso. Bazalaki bana ya likinda, pe bazalaki na biloko nyonso balingaki. Mokolo moko, ntango nabélémaki. . .

¹¹¹ Sikawa, ndenge nayebanaki na bango, moko na baninga na bango azalaki moninga na ngai ya motema. Biso nyonso tokomaki lokola baninga. Pe nayebanaki na bango ndenge wana, ntango balingaki ete nábalisa bango.

¹¹² Na bongo, nakendeki kotala bango. Nabimaki na Ford na ngai ya kala, libanda, pe namátaki bibuteli. Pe—pe namátaki, napananaki mwa mingi koleka, pe nayokaki bango. Bazalaki mpenza koswana. Bazalaki kosálana zúwa. Bautaki na esika ya mabína. Azalaki elenge mwasi kitoko mingi. Azalaki mwa moke lokola moko na bana-basi ya bonzénga koleka. Alóngaki mbano mingi kuna, pe apésamaki mituka ná biloko mosusu, mpo azalaki mokonzi ya basi kitoko. Nazalaki kotala bango, moko afandaki na litúmu moko pe mosusu na ngámbo mosusu, pe bazalaki koswana mpo na elenge mobali oyo abínaki na ye, to elenge mwasi moko, likambo ya ndenge wana.

¹¹³ Ntango nabélémaki, batelemaki mbala moko pe basimbanaki noki, na ma—maboko, pe bayaki na ekuke. Balobaki: “Ee, mbote, Ndeko Branham! Ozali malamú?”

Nalobaki: “Malamu. Bongo bino, bozali malamú?”

¹¹⁴ Pe, “Oh,” mobali alobaki, “na—na. . . Tozali na esengo mingi. Boye te, molingami?”

Pe mwasi alobaki: “Iyo, molingami.” Bomoni?

¹¹⁵ Sikawa, bomoni, bozali komitalisa eloko oyo ezali sóló te. Sikawa, bayétolaka móto na móto ya koyema te, lokola mangomba mosusu elukaka koyema pantekote, na likambo oyo esálémá eleki mibu nkóto to mibu nkóto mibale. Bayétolaka móto na móto ya koyema te. Pantekote ezali mpenza sóló lelo lokola ezáláká eleko wana. Bomoni? Iyo. Móto ezali kokoba kokita. Ezali móto ya koyema te. Ezali Móto ya sóló.

¹¹⁶ Na bongo, bango, bazalaki wana. Bomoni? Na—nakolinga kobika bongo te.

¹¹⁷ “Oh,” namilobelaki, “oyebi, kuna na nse, na ngámbo ya lobwaku, pembeni na ebale, kuna nde esika ba-bálani mosusu wana bazali kofanda.” Namilobelaki: “Mokolo ya mpóso sima na nzanga, nakokende kuna mpo na komona ndenge bazalaki.”

¹¹⁸ Na bongo, elongi na ngai ezalaki na bosoto, nalataki salopette ya bosoto, ná bisalelo na ngai. Namilobelaki: “Nakokende kuna na pwasa.” Nabélémaki na komibomba, nasalaki lokola nazalaki kotala-tala ba-isolateur ekokaki kobeba na nkake to eloko ya ndenge wana, pe nazalaki kobéléma kolanda singa ya telefone, ba-singa ya lótiliki pembeni na ebale. Chevrolet wana ya kala ezalaki liboso ya ndako na bango. Esilaki koleka pene na mobu moko, sima na ngai kobalisa bango. Pe ezalaki na—na. . . Ekuke ezalaki polele, pe nakokaki koyoka bango kosolola. Ezali komonana lokola bokosi, kasi nabélémaki pene mpenza mpo na koyoka, komona makambo bazalaki koloba. Natélémaki wana. Nalingaki mpenza koyeba malamau.

¹¹⁹ Nalingaka komona pe kondimisama ete nayebi likambo nazali koloba. Nasalaka bongo mpo na Liloba na Nzambe. Ezali Solo, to Ezali Solo te? Akokokisa Liloba na Ye, to Akokokisa Liloba na Ye te? Soki Akokisi Liloba na Ye te, na bongo Azali Nzambe te. Bomoni? Soki Akokisi Liloba na Ye, Azali Nzambe. Bomoni?

¹²⁰ Na bongo, nalingaki komona ndenge nini bango bazalaki. Napusanaki na mayele pembeni mpenza. Nayokaki mobali koloba: “Oh, molingami, nalingaki mingi mpenza kosombela yo yango.”

¹²¹ Mwasi alobaki: “Sikawa, tala, molongani.” Alobaki: “Robe oyo ezali malamau.” Alobaki: “Ee, ezali kitoko mpenza.” Alobaki: “Nasepeli na yango. Kasi, omoni. . .”

¹²² Napusanaki pene-pene lisusu, mpo na kotala na nzela ya lidusu, esika ekuke ya wagon ezalaki polele. Namonaki mobali afandi, kuna, pe mwasi afandi likolo ya mabólóngó ya mobali; azingaki mwasi na loboko, pe mwasi azingaki ye na loboko. Mobali azalaki na ekoti moko ya kala, ekitaki na pembeni, pe ezalaki na lidusu mwa moke, likolo na yango ya kofinama, pe atiaki lifuti na ye kati na yango. A—azalaki kotia

yango likolo na mésa. Alobaki: “*Oyo* mpo na biloko ya kolia. *Oyo* mpo na assurance. Pe *oyo* mpo na motuka.” Pe mbongo ekokaki te mpo na sanza mobimba. Nasosolaki ete amonaki robe moko na vitrine, azalaki kotala-tala yango mpóso mibale to misato, ezalaki na motuya ya dollar moko na ndambo. Alingaki kosomba yango. Alobaki: “Ee, molingami, okomonana kitoko mingi kolata yango.” Pe alobaki . . .

¹²³ Mwasi alobaki: “Kasi, molingami, na—nazali na robe. Na—nazali mpenza na mposa na yango te.” Bomoni? Pe elenge mwasi mokonzi wana . . .

¹²⁴ Nazongaki sima, pe natombolaki miso. Namonaki nsó—nsóngé ya likolo ya ndako mosusu wana. Natelemaki wana pe natalaki miniti moke. Namilobelaki: “Nani nde mozui?” Namilobelaki: “Soki, Bill Branham, soki osengeli kopona moko na bisika oyo, okokende wapi?” Mpo na ngai, nakopona eloko ya kitoko wana te, kuna likolo na ngomba. Nakopona ezaleli oyo awa na nse, mama-ya-ndako mpenza, moto oyo alingaki ngai pe atikalaki elongo na ngai, moto oyo azali koluka kotonga libota; ezali te moto oyo akosilisa mbongo na yo na bikelá-kela ya ndenge na ndenge, mpo na kopakola-pakola ná bilamba-ya-talo na ye; kasi moto oyo azali elongo na yo, eteni na yo.

¹²⁵ Nabosanaka yango te, likambo oyo esalemaki kuna. Moko aponaki mwasi kitoko, mosusu aponaki ezaleli. Sikawa, yango nde lolenge moko oyo bokoki kopona. Bóluka liboso ezaleli, na sima, soki olingi ye. Malamu.

¹²⁶ Bótala, Adama ya liboso ya Nzambe azalaki na makoki ya kopona mwasi na ye te. Aponaki te. Nzambe asalelaki ye mwasi moko, pe akokaki kopona ye te. Na bongo, tomoni ete mwasi yango amemaki ye mosika na Liloba na Nzambe. Akendeki kobondela mpo na likambo yango te. A—a—azali lokola yo na ngai te. Azuaki makoki ya kopona te. Pe lisusu, yango wana, mwasi alongolaki ye na esika na ye mpenza lokola mwana na Nzambe. Pe asalaki yango na kolakisa ye lolenge ya kobika eleki ya mikolo oyo, likambo oyo basengelaki mpenza kosala te. Kasi ezaleli ya mwasi etalisaki ete azalaki na libunga. Ba-mposa na ye ná ba-ntina na ye ezalaki mpenza mabe. Andimisaki mobali, na mabanzo na ye, ete polé ya sika pe ya mikolo wana, oyo autaki komona, pe ekeseneki na Liloba na Nzambe, ezalaki lolenge malamumu koleka ya kobikela.

¹²⁷ Basi boni lelo, ná mibali pe, bakomema basi malamumu mosika na Nzambe, to bakomema mibali malamumu mosika na Nzambe, na koluka koyebisa ye: “Losambo oyo, bino ba-Pantekotiste! Losambo wana,” balobaka, “oh, Ezali makambo ya kala. Esílá ngala. Komeka kondima Yango te.” Ezali malamumu koleka ete kobondela makasi liboso ya kobala mwasi yango. Ata azali kitoko ndenge nini. Ezali motindo moko mpo na mobali.

128 Andimisaki ye libanda na mokano na Nzambe pe amemaki ye kosala likambo oyo asengelaki kosala te, pe, na yango, ememaki kufa na bato nyonso. Yango wana Biblia epekisi ye kolakisa, to koteya, to kosimba Liloba na Nzambe na lolenge nyonso.

129 Nayebi, ndeko mwasi, mingi kati na bino bolobaka: “Nkolo abéngáki ngai mpo na koteya.”

130 Nakowelana na bino te. Kasi nakoyebisa bino ete Liloba elobi ete bosengeli kosala yango te. “Mwasi akoteya te, to akozua bokonzi moko te, kasi áfanda na kimia.”

“Ee,” okoloba, “Nkolo ayebisi ngai ete násala yango.”

131 Natii ntembe na yango ata moke te. Bolandaki Liteya na ngai mokolo wana na mpokwa, na ntina na Balama? Balama azuaki mokano na Nzambe ya liboso pe ya polele: “Kosala yango te.” Kasi akobaki kobulungana kino na suka Nzambe alobaki na ye ete ákende kosala yango.

132 Ekoki kosalema ete Nzambe apesi yo nzela ya koteya. Nalobi te ete Asalaki yango te. Kasi elongobani na Liloba pe na mwango na Ye ya ebandeli te. “Mpo mwasi asengeli kozala na botosi, ndenge mobeko pe elobi.” Ezali solo. Yango wana, asengeli kosala yango te.

133 Sikawa, botala lisusu, ndenge mwasi-na-libala ya mokili azali elilingi ya oyo ya molimo. Liloba elobi, été, “Asalemaki mpo na mobali, kasi mobali asalemaki mpo na ye te”.

134 Sikawa, nakolobela Mwasi na libala ya Klisto na ba-miniti moke, kasi nazali koluka kotalisa bino mobokó na yango.

135 “Mwasi asalemaki mpo na mobali, kasi mobali mpo na mwasi te.” Yango wana, na mibeko ya kala, libala ya ndongó elongobanaki na mobeko. Botala Dawidi, azalaki wana ná basi nkama mitano, pe Biblia elobi “Azalaki moto kokokana na motema mpenza ya Nzambe”. Ná basi nkama mitano, pe Solomona ná basi nkóto, kasi ata moko te kati na basi yango akokaki kozala na mobali mosusu.

136 Bózua bande na ngai ya *Libala Pe Koboma Libala*. Oyo, kuna likolo na ngomba, na Tucson, kala mingi te awa, nazalaki kobondela mpo na yango kuna na likolo. Babimisaki bana ya kelasi mpo na kotala ndenge Likonzi na Móto yango ezalaki kobaluka-baluka na ngomba pe kozua lolenge ya molongósi, kokende pe kozonga, komata pe kokita. Bato mosusu bazali awa bayebi yango, bazalaki kuna, pe bamonaki Yango; pe Yango. . . ntango wana nde Ayebisaki ngai Solo ya likambo oyo etali libala pe koboma libala. Soki ngámbo moko ekei *boye*, pe mosusu ekei *kuna*, Solo esengeli kozala esika moko. Sima na Bilembo Nsambo yango, Atalisaki Solo ya likambo yango.

137 Botala, sikawa, mwasi akokaki kozala bobele na mobali moko, mpo “Mwasi asalemaki mpo na mobali, kasi mobali mpo

na mwasi te”. Basi nkama mitano nyonso wana bazalaki bobele mwasi ya Dawidi, pe ezalaki elilingi. Ntango Klisto akofanda na Ngwende-ya-Bokonzi ya Nkóto-Moko, Mwasi-na-libala na Ye akozala bobele moto moko te, kasi bato zomi nkóto na nkóto, Mwasi na libala, banso kati na Moko. Pe Dawidi azalaki na basi ebele, lokola moko na moko, kasi bobele bango nyonso elongo bazalaki mwasi na ye. Lokola Nzoto mobimba ya bandimi ezali Mwasi na libala ya Klisto, mpo Ezali Ye, mwasi. Azalaki Mobali. Sikawa, biso tosalemaki mpo na Klisto. Klisto asalemaki mpo na biso te.

138 Yango nde tozali koluka kosala lelo na ba-búku na biso, tozali koluka kosala ete Liloba (oyo ezali Klisto) ékokana na mposa na biso, esika ete biso tóluka komikokanisa na mposa ya Liloba. Yango nde bokeseni.

139 Ntango mobali aponi elenge mwasi kati na libota moko, asengeli kotalela kitoko te, mpo kitoko ekosaka. Pe kitoko, kitoko ya mokili, ya mikolo oyo, ezali ya zabolo.

“Oh,” nayoki moto moko koloba kuna, “keba awa, motei!”

140 Nalobi ete makambo ya mokili oyo, oyo ebengamaka kitoko, ezali mpenza ya zabolo. Nakotalisa bino yango polele. Na bongo, na polé ya likambo oyo, tóluka-luka na Liloba mosantu ya Nzambe, mpo na komona soki ezali solo to te. Pe basi mosusu kati na bino bolingaka kozala kitoko mingi! Bótala esika yango euti. Na ebandeli, tomoni ete Satana azalaki kitoko mingi kino apéngwisaki Banje. Pe ye azalaki Mwanje ya kitoko koleka bango nyonso. Etalisaki ete ezali kati na zabolo. Masese elobi, Solomona alobaki: “Kitoko ezali mpamba.” Ezali solo. Lisumu ezali kitoko. Na ntembe te. Ebendaka.

141 Nalingi kotuna bino motuna moko pe koyebisa bino likambo moko awa. Nalingi ete bóyoka na bokebi, miníti moke. Kati na bikelamu nyonso na mokili, ba-ndeke, ba-nyama, tomoni ete na bomoi ya ba-nyama, nyonso longola bato, mobali nde azalaka kitoko, mwasi te. Mpo na nini bongo? Botala . . . Botala mbuli, ya—ya mobali azali kitoko pe monene ná maseke na ye, pe ya mwasi azali moke pe azángá maseke. Botala so—soso ya mwasi, mwa soso ya mwasi ya matóno-matóno, ná soso ya mobali monene pe azali na nsala kitoko. Botala ndeke ya mobali ná ndeke ya mwasi. Botala libata ya mobali ná ya mwasi. Bomoni? Pe ata ekelamu moko te na mokili, esalémá, oyo ekoki kopengwisa pe kobungisa lokumu na yango lokola mwasi.

142 Sikawa, bandeko basi, bótelema te mpo na kobima. Bózela kino tóyoka suka ya Likambo oyo. Bomoni? Bomoni?

143 Eloko ata moko te, ya mwasi ata moko te, longola bobele mwasi ya moto, ekoki komibebisa. Bobengaka mbwa ya mwasi “ndumba”, bobengaka ngulu ya mwasi “mwa—mwasi ya bosoto”, kasi na bomoto, bazali na bomoto mingi koleka

ndambo ya basi-vedette ya ba-film awa. Bakoki kozala bobele na bomoto.

¹⁴⁴ Pe mbongwana esalemi bobele na mwasi, mpo na lipéngwa. Ezali solo. Bomoni esika kitoko ezali komema ye? Sikawa, yango wana, lelo, tozali komona ete basi bakómi kitoko mingi. Soki bozui Pearl Bryan, bosílá komona fotó na ye? Eyebánáká ete alekaki basi nyonso ya Amerika na kitoko. Mwana-mwasi ya kelasi ata moko te, ata ya eteyelo nini, azangi kotika ye na—na sima. Boyebaki ete esengeli kozala bongo? Boyebaki ete Biblia elobi yango, ete ekozala bongo?

¹⁴⁵ Boyebi ete, na ebandeli, kokweisama eyaki na nzela ya basi? Pe kokweisama. . . Pe suka ekosukisma lolenge moko, basi bakozala na bokonzi pe bakokonza mibali, pe bongo na bongo. Boyebi ete Makomi elobi yango? [Losambo balobi: “Amen.”—N.D.E.] Boyebi, ezali mokolo oyo mwasi azali kolata bilamba ya mibali, pe azali kokata suki, makambo yango nyonso ekeseni na Liloba na Nzambe. Pe boyebi ete azali etaliseli ya lingomba? [“Iyo.”] Soki botali malamumu makambo basi bazali kosala, bokomona makambo lingomba ezali kosala. Ezali ya solo mpenza. Sikawa, sikawa, ezali mpenza solo, ndenge Liloba na Nzambe ezali solo.

¹⁴⁶ Eloko mosusu ya mwasi ata moko te esálémá mpo ékoka kobungisa lokumu na yango lokola mwasi. Ata bongo, mpo na yango, lokola asálémá. . .

¹⁴⁷ Mwasi azalaki na kokelama ya ebandeli te. Bikelamu mosusu nyonso ya basi ezalaki na kokelama ya ebandeli: ba-ndeke, mobali ná mwasi; ba-nyama, mobali ná mwasi. Kasi epai na bato, Nzambe asalaki bobele mobali, pe Alongolaki eloko moko kati na ye. Mwasi azali ekelamu euti na mobali, mpo Nzambe abandisaki eloko ya bongo te. Boluka-luka na Makomi. Ezali mpenza solo. Nzambe, te misie, na kokelama na Ye ya liboso. Mwasi atiamaki kuna.

¹⁴⁸ Kasi soki akoki komibatela malamumu, azali na lifuti monene koleka mobali. Atiamaki na libanda ya komekama. Kufa eyaki na nzela na ye. Mokumba ya liwa nyonso ezali likolo na ye. Kasi, na sima, Nzambe abalukaki pe asalelaki mwasi moko mpo na kozongisa Bomoi; ayeisaki Mwana na Ye na nzela ya mwasi, mwasi ya botosi. Kasi mwasi mabe azali eloko ya—ya mabe koleka; eloko moko te ekoki kokita na nse ndenge wana.

¹⁴⁹ Kaina, mwana ya Satana, akanisaki ete Nzambe andimaki kitoko. Asalaka bongo lelo. Kaina azalaki mwana ya Satana. “Oh, zela!”, okoloba. Tokokota na bozindo na yango te, kasi bótika nákata likambo yango mpo na bino. Biblia elobi ete “autaki na oyo mabe”. Na bongo, likambo esili. Malamumu. Sikawa, azalaki mwana ya Satana. Pe akanisaki ete soki atongi etumbelo pe abongisi yango kitoko mpo na kokumbamela, Nzambe akomémi yango.

150 Bakanisaka, bakanisaka ndenge moko lelo. Na ntembe te. Boye: “Tokotonga ndako ya monene. Tokozua bibongiseli ya minene. Tokotonga ndako ya monene koleka pe tokozua bato oyo balataka malamumu koleka, ba-nganganzambe ya mayele koleka.” Ntango mosusu Nzambe azalaka ba-kilometele milió zomi mosika na yango. Ya solo. Ata bongo, ezali lingomba.

151 Na boye, soki Nzambe amémiaka bobele kokumbamela, bosembo, mbeka, Kaina azalaki mpenza moyengebene lokola Abele. Kasi, ezalaki na nzela na emoniseli nde asosolaki ete baboti na ye baliaki mbuma ya póme te.

152 Awa nakoloba likambo moko oyo ekoyokana malamumu te mpo na motei, kasi nakoloba yango, ata bongo. Nayokaka bato mosusu koloba makambo, kobetaka mwa masolo ya kosekisa. Ezali mposa na ngai te. Kasi nalobaki boye: “Soki kolia mbuma ya póme esalaki ete basi báyebe ete bazali bolumbu, ekozala malamumu ete tópesa bango lisusu ba-mbuma ya póme.” Bomoni? Bomoni? Ah-hah. Bolimbisa ngai mpo na yango, kasi ezali bobele mpo ébongwana. Nauti kotia bino motema likolo, ntango nazali kolobela basi, pe bongo na bongo. Na—na—nalingi kokitisa bino motema mwa moke, mpo na makambo ekolanda. Sikawa, botala, bino. Ezalaki ba-mbuma ya póme te. Toyebi yango.

153 Na mikolo oyo, lingomba, ná makambo ezali kosala, ekómi lokola makambo mosusu nyonso ya bato, lingomba ebandi kokóma na mayele-ya-mokili. Bazali koluka kokómisa yango lingomba ya mayele-ya-mokili, na kobenda bokebi ya baton a bililingi pe ba-ngonga ya likolo mpenza. Ezali mawa mingi komona ba-Pantekotiste komikotisa na potopóto yango. Ekozala malamumu kotelema kuna na litúmu, ná ndúndú, pe Molimo ya Nzambe zonga-zonga na bino. Kasi bozali koluka komikokanisa na bamosusu, mpo bokómi ebongiseli. Yango nde esalaki yango. Bomoni? Mangomba ezali koluka kokóma na mayele-ya-mokili.

154 Bomikanisela, ndenge moto azali kokende mosika na mayele na ye, azali komiboma mokolo na mokolo. Ntango asalaki balúti ya bondóki, bótala mbano na yango. Ntango asalaki motuka, abomi bato mingi koleka balúti ya bondóki. Sikawa amisaleli bombe ya hydrogène. Namitunaka soki akosala na yango nini? Ya solo.

155 Ezali pe ndenge moko na lingomba, ntango azali komeka kosala makambo na nzela na mayele-ya-mokili, na nzela na kobakisa makanisi ya bato, ezali komema bino mosika na Nzambe, kino na kufa, koleka ndenge ezalaki na ebandeli. Ezali solo. Kopona losambo ndenge oponaki mwasi na yo te. Bomoni? Makambo mayele-ya-mokili esalaki mpo na mwasi, ezalaki mpenza monene, kasi mpo na losambo na yo, ezali malamumu kotalela yango te; amisaleli biloko ya kopakola, ba-poudre, ná makambo mosusu nyonso. Poná kokokana na ezaleli ya Liloba na Ye.

156 Tókokanisa sikawa mwasi na libala ya nzoto ya lelo ná oyo abengami lingomba-mwasi na libala ya lelo. Bókokanisa mwasi oyo azali komilengela mpo na libala lelo.

157 Sikawa, bótala naino makambo naye-ya-mokili esaleli mwasi. Ya liboso, akómi kobima ná suki bakátá, kobongisa suki lokola Jacqueline Kennedy, bomoni, to eloko moko ndenge wana. Pe boyebi likambo Biblia elobi? Biblia epesi ata mobali nzela, soki alingi, ya kolongola ye na libala, na kokabwana na ye, soki asali bongo. “Mwasi oyo akati suki na ye, azali mwasi ya lokumu te.” Biblia elobi bongo. Ya solo. Boyebaki yango te? Hein? Oh, iyo! Nateyaka mingi mpenza na Californie mpo bozanga koyeba yango. Ezali solo. Oh, iyo! Ekosunga ngai na nini? Bazali kosala yango, ata bongo. Okoki kozua ngulu te pe ópesa ye nkombo mosusu, mpo ákóma mwana-mpate. Bótala.

158 Bokoyina ngai sima na likambo oyo, kasi bokoyeba Solo. Bomoni?

159 Botala. Tókokanisa yango. Mwasi na libala ya mikolo oyo, ye wana azali koya pe apakoli bikela-kela ya ndenge na ndenge, akómi eloko oyo azali te. Soki asukoli elongi, okokima ye, ntango mosusu. Akobangisa yo mpenza, soki balongoli ye biloko nyonso wana. Ndenge moko na lingomba, ná etutú monene liboso, oyo bapakólá lángi, likindo ya Max Factor mpenza. Ah-hah. Bango mibale bazali na—na elongi kitoko ya lokuta, kitoko esalemi na bato kasi kitoko esalemi na Nzambe. Bango mibale bazangi mpenza ezaleli oyo esengeli.

160 Botala malamú, lokola Satana mpenza, bazali na oyo esengeli kopengwisa, bókokanisa ye sikawa na mwasi na libala ya mikolo oyo: alataka kupé, apakolaka, akataka suki, alataka bilamba oyo ekokani na mibali, pe ayókaka mokengeli oyo ayebisaki ye ete ezali malamú. Azali mopengwisi. Akonyokwama mpo na yango na ngámbo mosusu. Ya solo. Azali kosala yango mpo na kopengwisa, mpo na kozala eloko oyo azali te.

161 Yango nde lingomba ezali kosala, kozua ba-Doctorat minene na Likindo, na Philosophie, na Droit. Bongo bokoloba: “Mokengeli na biso azali *boye* na *boye to boye*”, ntango mosusu ayebi na ye Nzambe ata moke te, lokola Hottentot ayebi na ye butú ya Ezipito te. Ezali solo. Ya solo. Abikelaki makambo ya likindo kuna, kasi ayebi Nzambe ata moke te.

162 Mangomba ya mikolo oyo ná kopakola-pakola na bango ya likindo, basi na bango nyonso bakókolaka nkembo na bango nyonso, mpo na ricky moko pe mokengeli na bango, lokola Yezabele mpenza to nayebe te. Suki bakátá, ba-kupé, kopakola-pakola, nyonso wana babongisi yango malamú kokokana na likindo, yango nde esika lingomba ekómi. Ezali solo. Kasi ezaleli na ye ya molimo ezali mpenza mosika na oyo ya mama ya ndako oyo Yesu Klisto akoya kozua.

163 Soki Moklisto abali mwasi ya ndenge wana, etalisi ete alongolami na ngolu. Mposa na ye mpo na Nzambe ná mposa na ye mpo na libota, ndenge libota esengeli kozala, ezali mosika, ntango aponi mwasi ya ndenge wana. Te misie. Na ntembe te, akokaki ata moke te ma mposa ya Moklisto. Ezaleli ya molimo na ye ezali na nse koleka, akúfá, na kitoko na ye ya ebongiseli pe na bilúlélá ya mokili.

164 Yango mpenza nde esika lingomba ekómi lelo, etekeli Satana ezaleli epesamela ye na Liloba, mpo na kozua losambo esalema na mayele-ya-mokili. Na ntango wana, azalaki na makoki, lokola lingomba ya Nzambe, ya kokangama na Liloba na Nzambe pe kozala na Molimo Mosantu na mosala kati na yango, kosangisa Nzoto esika moko ná Liloba pe bolingo na Nzambe. Esika na yango, atekaki makoki na ye ya bokulutu, lokola Esau, pe aponaki ebongiseli, oyo epesaki ye nzela ya kosala nyonso alingi, ya solo, mpo na koyebana ndenge mama na ye asalaki, na Nicée, na Roma. Liloba na Nzambe!

165 Oh, likambo yango ekoti mingi kati na ba-Pantekotiste na biso! Ezali mpenza mawa mingi, kasi esalemi bongo.

166 Bótala malamú, miniti moke, mamélo na lingomba Katoliko. Mwasi yango, mpo na kokóma mamélo, pe kozua ezipelo ya suka wana, asengeli mpenza komipesa mobimba na lingomba yango. Akokóma (bomoto ya kati, nzoto pe molimo) libúlá ya lingomba yango. Akozala lisusu na makanisi na ye moko te. Akoki lisusu kozala na yango te, ntango azali kozua ezipelo ya suka wana, azali lisusu na makanisi na ye moko te, azali lisusu na mokano na ye moko te. Bomoni awa ete Satana azali kosalela bango lokuta na ye mpo na komekola oyo ya solo.

167 Lingomba ya Klisto ya solo, Mwasi na libala, esengeli komipésá mobimba na Ye pe na Liloba na Ye elakámá, kino likanisi mpenza, oyo ezali kati na Klisto, ézala kati na bino. Bokeseni ezali nini!

168 Pe lelo, tozali komona ete lingomba ya mikolo oyo, lingomba ya mokili ya mikolo oyo. Lingomba ya mokili ya mikolo oyo ná Lingomba ya molimo, nyonso mibale ezali na zemi, mpo na kobota bana mibali.

169 Moko na bango, na mbotama ya ebongiseli, akobota moko na...mokolo, na...mikolo oyo, na Likita ya Mangomba ya Mokili mobimba, oyo ekobimisa motemeli-na-Klisto na mokili, na nzela ya ebongiseli. Ezali mpenza Solo. Ntango mosusu nakozala na bomoi te mpo na komona yango. Nandimi ete nakomona. Kasi, bino bilenge, bómikanisela ete boyokaki motei moko koloba likambo yango. Sukasuka ekokokisama. Pe yango nde elembo na nyama, ntango akosala Likita ya Mangomba ya Mokili mobimba yango. Pe akobota mwana na ye ya mobali, motemeli-na-Klisto.

¹⁷⁰ Oyo mosusu akumbi zemi na nzela ya Liloba na Nzambe pe akobota Nzoto, Nzoto ya Yesu Klisto oyo esili kotongama, ezali Mwasi na libala. Nzoto ya Klisto esili naino kotongama te. Bato boni bayebi yango? Mobali ná mwasi bazali moko. Pe Klisto azali Nzoto moko, Liloba. Mwasi na libala asengeli kozala eteni etikali ya Nzoto yango. Pe nyonso mibale, elongo, ezali kosala lisusu Nzoto moko. Lokola Adama azalaki na ebandeli: mobali ná mwasi na ye bazali moko. Sikawa, Ye, Mwasi na libala ya solo, amipésá mpenza mobimba na Ye, kino Akosálela likanisi na Ye moko te. Likanisi na Ye, na ntembe te, ezali mokano na Ye, pe mokano na Ye ezali Liloba na Ye.

¹⁷¹ Sikawa bótala mwasi na libala ya maloba, oyo aponami na moto, pe bókokanisa mwasi na libala ya molimo ná mwasi na libala ya nzoto, ya lelo, Yezabele ya mikolo oyo, alokami na Akaba na ye, biloko kitoko ya Max Factor pe nyonso wana. Bótala lingomba, ndenge moko, kasi, mpo na Liloba ya Nzambe na Bomoi, azali mwasi ya ndumba; bibongiseli minene, ba-ndako minene, mbongo mingi, lifúti monene, bamipésá mobimba. Mibali batelemaka na eteyelo bazali kondima ete ezali mabe te, pe bazali kokanga miso liboso na yango. Kopengwisama mpenza, eloko mosusu te. Ezali ya solo Eleko ya lingomba Laodikia ekufi miso, ndenge mpenza Biblia elobelaki yango. “Olobi: ‘Nazali mozui. Nafandi lokola mwasi-mokonzi. Nazali na bosenga ya eloko moko te.’ Kasi oyebi te ete ozali mobóla, moto na mawa, mokufi miso, moto na bolozzi, bolumbu: kasi oyebi yango te.” Soki ezali YANGO ELOBI NKOLO ya Emoniseli 3 te, boye, natángi Yango naino te. Yango nde oyo azali, kasi ayebi yango te! Bókánisa naino.

¹⁷² Soki oyebisi mobali to mwasi moko, na balabala, oyo azali mpenza bolumbu, pe oyebisi ye ete azali bolumbu, kasi alobi: “Ezali likambo na yo te”, ee, bongó na ye ezali kosala malamau te esika moko. Makanisi na bango ezali kosala malamau te.

¹⁷³ Pe, okoki kotángá Liloba na Nzambe, ndenge bato basengeli kosala, pe libatizi ya Molimo Mosantu oyo tozali na yango lelo, kasi, bato, ee, baktala yo lokola obeli liboma. Soki olobi na bango: “Basengeli. . .” Basengeli kobotama mbala mibale. Basengeli kondima Biblia.

¹⁷⁴ Balobaka: “Ezali masapo ya Bayuda, ya ntango ya kala. Lingomba na biso ezali na nzela.” Bato na bolozzi, bato na mawa, bakufi miso, bolumbu, kasi bayebi ata yango te. Ezali mpenza. . . Pe Biblia elobi ete bakómi na lolenge yango.

Ndenge nini mosakoli ya solo akoki kozanga komona yango? Nayebi te.

¹⁷⁵ Ezali kokota moke-moke na mangomba na biso nyonso, bisika nyonso. Bótala naino, yango nde makambo ya mikolo oyo. “Mobange mwasi ya ndumba ná bana na ye ya basi”, ya Emoniseli 17, azali kopesa malakisi na ye ya likindo, oyo ekeseni

na Liloba na Nzambe, na “babóla, bakufi miso, bato na bolozí”. “Pe bakutaki kati na ye milimo ya baombo, ya mibali ná basi ya—ya bipai na bipai.” Esika ya kobenda bato . . .

¹⁷⁶ Klisto ezali kotatola Liloba na Ye, oyo ebendaka bato. Abendaka bato ya mangomba te, baoyo babendamaka na bibongiseli minene, misala minene, biloko ya minene koleka pe ya kitoko mingi. Kasi Liloba na Nzambe ebendaka Mwasi na libala ya Klisto.

¹⁷⁷ Sikawa botala. Ezali malamú mpenza, ko—komona ete—ete lingomba ezali koluka kobenda bokebi ya bato na nzela na ba-nzambala kitoko pe ba—korále balati kitoko, ná basi oyo bakati suki pe bapakoli bikela-kela na bilongi. Bakanisaka . . . Pe bayembaka lokola Banje. Bakosaka lokola zabolo, babimaka butu mobimba, kokende bisika ya mabina, pe bamonaka yango bobele malamú. Pe yango nde bakanisaka: “Ezali malamú. Ezali kitoko.” Kasi, bomoni, ezali lokuta, bamisaleli yango. Ezali Liloba na Nzambe te.

¹⁷⁸ Na ntango wana, Mwasi na libala ya solo abendaka bokebi ya Nzambe, na kotósa Liloba na Ye. Sikawa botala. Sikawa tótala Klisto.

¹⁷⁹ Okoloba: “Ee, sikawa, zela naino, kitoko ozali kolobela, ezali nini?”

¹⁸⁰ Biblia elobi, na Yisaya 53:2, ete ntango Yesu ayaki, “Azalaki na kitoko te ete tótalela Ye.” Ezali solo? [Losambo balobi: “Amen.”—N.D.E.] Kitoko ata moke te. Soki Ayaki na kitoko ya mokili, lokola Satana lelo, bato mingi balingaki kolanda Ye pe kondima Ye, ndenge basalaka na lingomba lelo. Balingaki kondima Ye, koyamba Ye, ndenge basalaka Satana lelo. Ya solo mpenza. Kasi, Ayaki na kitoko ya ndenge wana te, kasi Ayaka ntango nyonso na kitoko ya ezaleli. Ezali yango, Klisto azalaki Mobali kitoko te, mbinga te, makasi pe engambe te. Nzambe aponaka bato ya ndenge wana te.

¹⁸¹ Nazali komikanisela ete mokolo moko, mosakoli moko akendeki ko—kopona mokonzi, kokómisa mwana moko ya Yisai mokonzi, mpo na kozua esika ya mokonzi mosusu, Saulo. Na bongo, Yisai abengisaki mwana na ye ya mobali, ya kitoko, monene pe molai. Alobaki: “Motóle ekobonga na motó na ye.”

¹⁸² Mosakoli abélémaki mpo na kosopa mafuta likolo na ye. Alobaki: “Nzambe aboyi ye.” Pe Aboyaki bango nyonso, kino akómaki na mwana moko na lopo motane, mapeka ekwéyá. Asopaki mafuta likolo na ye, pe alobaki: “Nzambe aponi ye.” Bomoni? Bisó toponaka na kotala na miso. Nzambe aponaka na ezaleli.

¹⁸³ Ezaleli, ata moto moko te azalaki na ezaleli lokola ya Yesu Klisto. Soki ezali kati na yo, ekotalisa Ye. Tomoni ete ezali solo. Ezali kitoko na Ye ya mokili te nde ebendaka Mwasi na Ye ya libala. Ezali ezaleli na Ye, ezaleli ya Lingomba, nde Yesu

alukaka; esika ya ba-ndako minene te, esika ya bibongiseli minene te, esika ya bandimi mingi te. Alakaki kokutana esika bato mibale to misato basangani. Ya solo. Esika yango nde mondimi ya solo atongaka elikia na ye, ezali likolo ya Liloba na Nzambe oyo ezali kotatolama kati na Solo, ezali bongo. Bópona kokokana na Liloba na Ye, na etónge oyo elingaka mokili te. Bango bayinaka yango.

¹⁸⁴ Kokamwa te ndenge akabwáni na Ye, mpo azangaki emoniseli na Ye, pe azali na yango te. Azali komitungisa mpo na ye te, lolenge abikaka pe asalaka, pe biloko ya mokili boni azali na yango.

¹⁸⁵ Azali koluka nde ezaleli na ye, ezaleli ya Klisto. Sikawa, bózela mwa moke sikawa. Ezali yango. Aponi Mwasi na libala mpo na kotálisa polele ezaleli na Ye, pe ezali wana nde mangomba ya mikolo oyo, ya lelo, bazali mpenza koleka pembeni ya manaka na Ye—na Ye, na ba-milió na kilometele, mpo bandimaka te ete *Oyo* ezali Solo. Na bongo, ekoki kosalema ndenge nini? Sikawa, Azali kozela mokolo oyo Mwasi na libala yango akobongisama, Baebele 13:8, lokola Ezalaki mpenza, lokola Ye. Asengeli kozala mosuni na Ye moko, mikuwa yango moko, Molimo yango moko, motindo moko na nyonso, kotongama ndenge moko mpenza, pe na ntango wana, bango mibale bakokóma moko. Soki lingomba ekómi bongo te, bakokóma moko te. Ezaleli ya Ye, Liloba, mpo na eleko oyo, esengeli kopesa lolenge. Asengeli kopesama lolenge, kokóma lokola Ye.

¹⁸⁶ Sikawa, mpo na kosilisa, nalingi koloba ntina oyo nalobi makambo oyo, pe nako—nakosilisa. Mokolo mosusu na butu, na ngonga ya misato ya ntongo, nalamukaki.

¹⁸⁷ Nasengi na moto nyonso kati na bino, ete áyanola na likambo oyo: Nasílá koyebisa bino likambo na Nkombo na Nkolo kozanga kozala solo? Ezalaka ntango nyonso solo. [Losambo balobi: “Amen.”—N.D.E.] Na bosembo ya motema na ngai, Nzambe ayebi ete ezali solo. Na makambo nkóto na nkóto oyo esílá kolobama, ata moto moko te, esika moko te na mokili, akoki koloba ete Asílá kozanga kokokisa liloba moko na yango. Ekokisamaka ntango nyonso malamum mpenza.

¹⁸⁸ Ata ntango nazalaki na Phoenix, mokolo wana, to esili koleka pene na mobu moko, pe nayebisaki bino mpo na Liteya wana ya—ya *Misie*, tokómi ntango nini? Pe nayebisaki bino: “Banje nsambo bakokutana kuna”, pe ekozala kofungwama ya Bilembo oyo, pe nyonso wana. Pe kuna, ma—magazine *Life* ekomaki likambo yango, Móto monene oyo ezalaki komata na mipepe, na mosánda ya kilometele ntuku minei na mwambe, pe na monene ya kilometele ntuku minei na misato. Balobaki ete bakokaki koyesosola te soki ezalaki nini; kino sikawa bayebi yango te. Pe bato mosusu bazali awa, na ndako oyo, na mpokwa

oyo, baoyo bazalaki kuna elongo na ngai ntango esalemaki, ekokanaki mpenza na oyo Elobamaki. Ayebisaki ngai makambo oyo ekosalema, pe esalemaki mpenza ndenge wana. Ndenge moko na moko na Bilembo yango efungwamaki, pe emonisaki mabombami oyo ebombamaki na bileko ya ba-reformateur pe bongo na bongo, na kobonga be.

¹⁸⁹ Ndenge nini, kuna likolo na ngomba, bato, misato to minei na bango bazali awa sika-sikawa, iyo, koleka ata wana. Ezalaki ngai komata ngomba, Molimo Mosantu alobaki: “Lokóta libanga wana.” Tozalaki na bokila. Alobaki: “Bwáka yango na likolo, pe lobá: ‘YANGO ELOBI NKOLO.’” Nasalaki yango. Mwa mopepe na lolenge ya mulongósi ekitaki longwa na yango. Nalobaki: “Kati na ngonga ntuku mibale na minei, bokomona loboko ya Nzambe.” Bato yango bazali awa sika-sikawa.

¹⁹⁰ Mokolo elandaki, pene na ngonga ya zomi, natelemaki wana, nalobaki: “Milengela. Kende kobombama kuna na nse ya motuka”, mobundi-etumba-ya-kala. Nalobaki: “Likambo moko elingi kosalema.” Likolo ezalaki polele, kuna likolo ya ngomba moko monene. Ekumbaki ya Móto ekitaki longwa na Likolo, Esalaki makelele makasi, Ebetaki bitutu ya ngomba, ndenge wana. Na—natelemaki na nse na Yango. Nalongolaki ekoti na ngai, naningisaki motó te. Ekitaki pene na centimetele ntuku libwa to mokama na ntuku mibale likolo na ngai, pe Etimolaki libulu zonga-zonga na etutu yango, ndenge wana, pe ebétaki lokito. Ezongaki na mipepe, Ebalukaki lisusu, pe Ekitaki, mbala misato, Ekataki ata songe ya ba-nzete ya mike, na ntaka ya métele mokama na ntuku mwambe na misato. Boyoki bato oyo koloba: “Amen”? Bazalaki kuna ntango esalemaki, bomoni, pe ebétaki lokito mbala misato.

¹⁹¹ Ntango babimaki na nse ya mituka pe nyonso wana, bazongelaki ngai, balobaki: “Soki ebétaka yo, ata elembo ya mafuta ya nzoto na yo elingaki kotikala te.”

¹⁹² Nalobaki: “Ezalaki nde—Ezalaki Ye. Azalaki kosolola na ngai.” Nzambe alobaka na nzela ya ekumbaki. Bomoni? Pe Likonzi na Móto oyo bomonaka na fotó ezalaki wana.

Pe ntango Ezongaki na likolo, balobaki: “Ezali nini?”

Nalobaki: “Kosambisama ekobeta Ngambo ya Westi.”

¹⁹³ Mikolo mibale sima na yango, etikalaki moke Alaska ézinda. Bomoni? Ebetaki mbala moko kuna, lokito ya liboso.

¹⁹⁴ Ezali ete, eloko moko esengeli kosalema mpo na kotalisa yango. Ndakisa, moto moko atiaki mungwa na mbeki, abwakaki yango na mai, pe alobaki: “YANGO ELOBI NKOLO, tika ete mai ya malamú ézala.” Ndakisa mosusu, Yesu azuaki mai, asopaki yango na mbeki, pe—pe akómisaki yango vinio.

¹⁹⁵ Eloko moko esengeli kozala mpo na kotalisa yango. Ezalaki nde yango, eloko oyo emataki likolo pe ekitaki. Yango nde

ebandisaki mwa ekumbaki wana. Liboso ngonga ntuku mibale na minei ékoka, Aningisaki ngomba yango kino etímolaki zonga-zonga.

¹⁹⁶ Mobateli Misie Blair afandi awa, nazali kotala ye sikawa, azalaki kuna pe alokotaki biteni na yango, pe bongo na bongo. Terry Sothmann ye oyo, ná bamosusu, bazali awa, ná Billy Paul. Ná bandeko, mingi na bango bazali awa, baoyo bazalaki kuna pe bamonaki yango kosalema, ntango Ekataki yango na biteni.

¹⁹⁷ Ezali lisapo te. Ezali solo. Esalemaki na eleko ya Biblia te. Ezali sikawa. Bomoni? [Losambo balobi: “Amen.”—N.D.E.] Nzambe yango moko oyo alakisaka ngai ntango nyonso makambo yango, pe ekokisamaka mpenza ndenge elobamaka. Ezanga kokokisama ata mokolo moko te. Sikawa, nazali kokumisa nde Ye.

¹⁹⁸ Eleki mwa ba—mpóso, nazalaki kati na emononeli. Natelemaki e—esika moko ya likolo, pe nasengelaki komona etaliseli ya Lingomba liboso. Pe namonaki, kouta na... Natelemaki nde *boye*, nazalaki kotala na Westi. Pe, kouta na ngámbo *oyo*, namonaki etóngá kitoko ya basi, balataki kitoko mpenza, bazalaki na suki milai bazóngisa yango kitoko na sima, balataki bilamba ya maboko milai, ná bajúpe milai ya malamú. Bango nyonso bazalaki kotambola na mizíki ya lífilí, lokola “Tokei liboso, basodá—Baklisto, kotambola lokola na etumba, ná ekulusu ya Yesu kokende liboso”. Ntango bazalaki koleka, natelemaki, pe Eloko moko ezalaki kuna, Molimo moko, ezalaki Nzambe, elobaki: “Mwasi na libala Ye wana.” Natalaki, pe motema na ngai esepelaki. Pe Abalukaki na ngámbo *oyo*, pe Alekaki sima na ngai.

¹⁹⁹ Sima na ntango moke, ntango azongaki na ngámbo *oyo*, Elobaki: “Sikawa lingomba ya mikolo oyo ekoleka.” Pe lingomba ya Azia eyaki. Namóná naino etóngá ya mbindo ya boye te.

²⁰⁰ Mangomba mosusu eyaki, ya bikólo ndenge na ndenge. Ezalaki nsomo kotala bango.

²⁰¹ Pe na—nazali koloba likambo oyo mpo natindami koloba solo, liboso na Nzambe. Ntango Alobaki: “Lingomba ya Amerika ezali koya sikawa, na lífilí.” Soki nasílá komona etóngá ya bazabolo, ezalaki yango. Basi yango bazalaki mpenza bolumbu, ná eloko moko ya kala ya lángi ya gris, lokola lángi ya loposo ya nzoku. Basimbaki yango liboso na bango, kasi eteni ya likolo ezalaki te. Pe bazalaki kobina na lolenge wana, oyo, ma—mabina bilenge babinaka awa, twist ná soko nini wana, pe lolenge ya mizíki yango ezalaki kobeta. Pe ntango namonaki Miss U.S.A. koya, nalingaki kokweya sénza.

²⁰² Sikawa, oyo ezali YANGO ELOBI NKOLO. Soki bondimaka ete nazali mosali na Ye, bóndimela ngai sikawa. Nakokaki koloba yango te ata mpo na eloko moko ya mokili. nini. Mokili

mobimba ezali ata na mbongo ya kopesa ngai te mpo na koloba yango, soki ezalaki solo te.

²⁰³ Ntango alekaki, ezalaki eloko ya mbindo koleka, oyo namóná naino te. Nakanisaki: “E Nzambe, makasi nyonso oyo batei ná biso bandeko tosali mpo na kopesa Yo Mwasi na libala, pe yango nde nyonso tokoki kosala.” Azalaki koningisa nzoto, wana asimbi eloko *wana* liboso na ye, lokola júpe ya babíni zebola, asimbaki yango liboso na biteni na ye, eteni na ye ya nse, *boye*, wana azali kobina pe koningisa nzoto lokola bilenge basalaka awa na . . . na ba-emission ya bosoto oyo bazalaka na yango, ya koningisa nzoto. Ezalaki Miss Boklisto ya Amerika.

²⁰⁴ Na bosembo ya motema, na lisungi ya Nzambe, yango nde lolenge na yango na miso na Ye. Na—na . . . nalingaki . . . nakokaki kokweya sénza. Namilobelaki: “Makasi nyonso, mateya nyonso, pe komeka kondimisa nyonso?” Bango nyonso bakátá suki, pe bazalaki koningisa nzoto pe kosala bisálélá, wana basimbi eloko *yangó* liboso na bango. Bakómaki pembeni na esika ngai natelemaki elongo na Ezali ya kokamwisa. Nazalaki komona Ye te. Nazalaki koyoka Ye kosolola na ngai; Azalaki mpenza pembeni na ngai. Kasi ntango babalukaki na ngámbo *oyo*, basimbaki eloko *yangó*. Bazalaki koningisa nzoto, koseka pe kosala bisálélá, bazalaki kosala bongo, basimbaki eloko *yangó* liboso na bango.

²⁰⁵ Ntango natelemaki wana, Liboso na Ye, pe mosali na Ye. “Sima na makasi nyonso nasalaki, yango nde nyonso nakokaki kosala?” Nakanisaki: “E Nzambe, esungi ngai na nini? Esungi na nini? Kolela nyonso, kobondela bato, kondimisa bato, pe bilembo minene, bikamwiseli ná bikamwa nyonso oyo Otalisaki. Pe ngai nazalaki wana, kozonga na ndako pe kolela, sima na koteya bango pe nyonso wana, kasi esungi ngai na nini? Na sima, nasengeli kopesa Yo eloko ya *boye*, lokola Mwasi na libala?”

²⁰⁶ Ndenge nazalaki wana, kotala, alekaki na ye koleka. Bokanisa naino mokongo na ye, alataki eloko moko te, asimbaki eloko *wana* liboso na ye ntango azalaki koleka pe kodenda-denda, ndenge wana, na mizíki ya twist, kobwaka maboko ná makolo na ye ndenge wana. Pe, ye, oh, ezalaki bosoto, ndenge azalaki kosala bisálélá, kobalola-balola nzoto na ye ndenge wana. Sikawa ngai . . .

²⁰⁷ Okoloba: “Elingi koloba nini, Ndeko Branham?” Nayebi te. Nazali bobele koyebisa bino likambo namonaki.

²⁰⁸ Ntango alekaki ndenge wana, natalaki ye. Oh, namiyokaki mpenza kokweya sénza. Nabalolaki elongi. Nakanisaki: “E Nzambe, nakweisami. Nazali—nazali lisusu na ntina ya komeka te, sikawa. Ekozala malamú kotika.”

²⁰⁹ Madame Carl Williams, soki ozali awa, mpo na ndoto oyo oyebisaki ngai, eleki ntango moke, olotaki yango mokolo wana

na butu, pe ezalaki kotungisa yo, yango wana. Babotoli ngai yenda na maboko.

²¹⁰ Na bongo, namilobelaki: “Ekozala malamumu mpo na ngai kōkōbosana yango.” Esilaki mpo na ngai.

²¹¹ Na sima, mbala moko, nayokaki Yango koya lisusu. Pe na ngámbo *oyo*, Mwasi na libala yango moko oyo abalukaki ngámbo *oyo* azalaki koya. Bilenge basi yango bayaki lisusu, pe moko moko na bango alataki molato ya ekólo oyo autaki, ndakisa Suisse, Allemagne, pe bongo na bongo, moko na moko alataki lolenge ya molato wana, bango nyonso ba-suki ya milai, ndenge moko na baoyo ya liboso. Pe tala bazalaki koya, kotambola. “Tokei liboso, basodá-Baklisto, tótambola lokola na etumba.” Pe ntango bango nyonso balekaki na lífílí liboso, esika totelemaki, mbala moko, miso nyonso etalaki epai boye. Na sima, babalolaki mitó pe bakobaki kotambola.

²¹² Pe bobele ntango babandaki komata na likolo, oyo mosusu amataki likolo na ngomba pe akitaki, *boye*.

²¹³ Bango babandaki kotambola pe komata kino na likolo. Pe ntango bazalaki kotambola, namonaki bilenge basi mibale to misato na sima, lokola bilenge basi ya bikólo mosusu, lokola Suède, Suisse to ekólo mosusu. Babandaki kotala pembeni-pembeni, pe. . . Nalobaki: “Bósala bongo te! Bóbima libanda na molongo wana te!” Pe ntango nagangaki bongo, kati na emononeli, nalamukaki, nazalaki wana ná loboko na ngai kosembwama *boye*. Namilobelaki: “Ee. . .”

²¹⁴ Yango wana nalobaki likambo nazali na yango na mpokwa oyo. Nalingi kotuna bino motuna. Ntango ekómi mosika koleka makanisi na biso? Ekoki kosalema ete Asili kobengama pe koponama, kotiamama elembo na kati? Ata moko akobakisama lisusu te, boyebi. Ekoki nde kosalema? Oh, iyo. Oh, iyo.

²¹⁵ Bozali komikanisela likambo nalobaki mokolo wana, na kolia bilei-ya-ntongo. Ntango mputulú ya felele ekutanaka, ya mibali ná ya basi, mimboto milió ebimaka, ba-máki milió ebimaka. Kasi bobele moko kati na yango etikalaka na bomoi, nzokande, nyonso ezalaka ndenge moko: moko kati na milió. Yango nyonso, máki yango moko pe lolenge yango moko ya momboto. Bobele moko nde etikalaka na bomoi. Bamosusu nyonso ekufaka.

²¹⁶ Moto moko te ayebebi máki oyo ekoméli, pe, oh, makambo na yango. Nzambe asengeli kozua mokáno yango, soki ekozala mwana mobali to mwana mwasi, pembe makasi to mwa moindo, to ndenge nini akozala. Nzambe azuaka mokáno yango. Ezali oyo ekómi liboso te, kasi ya liboso oyo Nzambe akáni. Ntango mosusu moko akómi *awa*, pe mosusu. . . Soki bosilá komona yango, na kati ya éprouvette, komona yango ndenge ekutanaka. Ngai nasilá komona yango. Nzambe asengeli kozua mokáno yango. Moko, yango nyonso ndenge moko, kasi ezali likambo

ya koponama. Kobotama na nzoto, ezali likambo ya koponama. Nzambe aponaka moko kati na milió.

²¹⁷ Ntango Yisalaele ebimaki na Ezipito mpo na kokende na mboka ya elaka, bazalaki pene na bato milió mibale. Bango nyonso bazalaki na nse ya mbeka ya mwana-mpate yango moko, soki te, balingaki kobika te. Bango nyonso bayokaki Mose, mosakoli. Bango nyonso babatisamaki na ye, kati na Mai-na-Mbu Motane. Bango nyonso babinaki, basi elongo na Miryam, kopumbwa-pumbwa, (ntango) pembeni na libóngo, ntango Nzambe abomaki monguna. Bango nyonso bazalaki elongo na Mose, pe bayokaki ye koyemba na Molimo. Na biliki, bango nyonso baliaki máná kokita longwa na Likolo. Máná ya sika, butu nyonso, ezali elilingi ya Nsango, bango nyonso baliaki yango. Kasi, kati na milió mibale wana, bato boni bakótaki? Mibale. Moko kati na milió.

²¹⁸ Baklisto bazali pene na milió nkama mitano na mokili mobimba na mpokwa oyo, soki otángi ba-Katoliko pe bango nyonso. Milió nkama mitano ya bandimi ya maloba na mokili mobimba. Soki Konetolama esalemi na mpokwa oyo, elingi koloba. . . soki esengeli mpenza kozua moko kati na milió. Nalobi te ete ezali bongo. Kasi soki ezali bongo, na ngonga ntuku mibale na minei ezali koya, bato nkama mitano bakolímwa. Bokoyoka nsango na yango ata moke te. Ata bongo, bato mingi balímwaka, pe eyebanaka na yango pe te.

²¹⁹ Na bongo, moninga, likambo oyo esalemaki ntango Yoane Mobatishi ayaki, ekoki pe kokómela biso. Ata bayekoli balobaki: “Mpo na nini Makomi elobaki, mpo na nini ba—bantóma to basakoli balobaki, mpo na nini elobamaki ete Eliya asengeli koya liboso mpo na kobongisa makambo nyonso?”

²²⁰ Alobaki: “Nalobi na bino ete Eliya asilaki koya, kasi boyebaki yango te.”

²²¹ Moko na mikolo oyo, tokoki kotikala awa: “Bongo Konetolama oyo esengeli kosalema liboso na minyoko?”

“Esilá kosalema, pe boyebaki yango te.”

²²² Nzoto mobimba, etiami elembo na kati, esengeli bobele kobátela Yango na molongó. Nalobi te ete ezali bongo. Nabanzi ete ezali bongo te. Kasi, moninga, ntango. . .

²²³ Na mpokwa oyo, soki toyoki na mitema na biso, ete tosengeli kobongisa bomoi na biso, mpo na makambo tosalaki, bótika nápesa bino toli, lokola ndeko na bino motei. Nakoloba yango na eteyelo, mpo na mbala ya liboso. Ata bongo, na mpokwa oyo, nalobeli *Yango* na molai, koleka makambo mosusu nyonso, pe ntango mosusu nyonso, liboso na bato nyonso, mpo nazalaki na bonsomi mingi na mayangani oyo. Soki ondimaka ete nazali mosakoli ya Nzambe, yóka likambo oyo nayebisi bino. Soki ozali na mwa mposa moke na motema, kende epai na Nzambe sika-sikawa. Sala yango.

224 Mibali, bózela mwa moke. Bótala bi—bindimeli na bino, oyo bosalelaka. Bótala kati na mangomba na bino. Elongobani mpenza na Liloba na Nzambe? Bokokisi makambo nyonso oyo esengami? Okoloba: “Nazali moto malamamu.” Nikodeme pe azalaki bongo, ná bato mosusu nyonso. Ba—bazalaki bato malamamu mpenza. Bomoni? Yango ezali ata na ntina moko te.

225 Pe, bino basi, nalingi ete bótala na talatála, pe bótala eloko nini Nzambe asengi na mwasi. Sikawa, bótala na talatála ya Nzambe, na talatála ya lingomba na bino te, na talatála ya Nzambe; pe bótala soki, na bomoi na bino, bokoki mpenza kozala Mwasi-na-libala ya molimo ya Yesu Klisto.

226 Batei, bókanisa ndenge moko. Bozuaka nzela ya mokuse *awa*, mpo na koboya kotungisa makanisi ya moto moko kuna? Bokoki kosala *boye* soki ezalaki te. . . mpo bakobengana yo na lingomba? Soki ozalaka na makanisi ya boye, ndeko na ngai molingami, tika nákebisa yo, na Nkombo na Yesu Klisto, kimá yango sika-sikawa.

227 Pe, madame, soki okoki kozala na mosanda ya kozala Moklisto te, Moklisto ya maloba te; kasi na motema na yo, bomoi na yo ékokana mpenza na oyo esengami awa na mokanda ya libala ya Nzambe.

228 Pe, mondimi ya lingomba, soki lingomba na bino ezali bongo te, soki ezali te na mosanda ya makambo Nzambe asengi na Liloba na Ye, bimá na yango pe kota kati na Klisto.

229 Ezali likebisi ya polele. Toyebi te ntango nini, bino pe boyebi te ntango nini, mokolo moko, engumba oyo ekozinda awa na nse ya mai-na-mbu oyo.

230 “Oh, Kapernaume,” Yesu alobaki, “yo oyo ominetoli kino na likolo, okokitisama kino na ewelo. Mpamba te, soki misala na nguya oyo ésalemaka na Sodoma pe Gomora, elingaki kozala kino lelo.” Pe Sodoma ná Gomora ezali na nse ya Mer Morte. Pe Kapernaume ezali na nse na mai-ya-mbu.

231 Yo engumba oyo emibengi engumba ya Banje, oyo ominetoli kino na likolo, pe ezali kotinda makambo ya bosoto, ya mbindo ya ndenge na ndenge, ba-mode pe biloko mosusu, kino ata bikólo ya bapaya ekómi koya awa mpo na kozua mbindo na biso pe kotinda yango bisika mosusu, na ba-losambo na yo ya kitoko, ná ba-ngonga pe biloko mosusu, ndenge bosalaka. Kobosana te, mokolo moko okozala na nse na mai-ya-mbu, sikawa mabelé etondi na madusú lokola zála monene ya banzóí. Nkanda ya Nzambe ezali konguluma mpenza likolo na yo. Akokoba kobatela mwa zelo etikali na yango mikolo boni? Na ntango oyo, mai-na-mbu yango kuna, na bozindo ya metele nkóto na nkama motoba, ekoselumoa na kati, kino na Salton Sea. Ekozala mpasi mingi, koleka mokolo ya suka ya Pompéi. Bóngola motema, Los Angeles.

²³² Bóbongola mitema, bino nyonso, pe bóbongwana epai na Nzambe. Ntango ya nkanda na Ye ezali likolo na mokili. Bókima, wana ntango ya kokima ezali naino, pe bókota kati na Klisto.

Tóbondela.

²³³ Nzambe molingami, wana molimo na ngai ezali kolenga, motema na ngai ezali kotangisa mpisoli ya likebisi. E Nzambe, sala ete mibali pe basi bakanisa te ete nalobeli bango makambo ya liseki, pe bandimi ya losambo bakanisa te ete ezali makanisi na ngai to eloko moko mpo na kotelemela bango. Tika bámona, Nkolo, ete ezali kati na bolingo.

²³⁴ Ozali motatoli na ngai, Nzambe na-Nguya-Nyonso, ete natamboli na libóngo oyo mobimba, likolo kino na nse, mobu na mobu, mpo na kosakola Liloba na Yo. Zala motatoli na ngai, E Nzambe, soki esalemi na mpokwa oyo, nayebisi bango Solo. Oyebi ete emononeli oyo ya Mwasi na libala ezali Solo. Natiaki Nkombo na Yo na kati, Nkolo, pe nalobaki ete ezali YANGO ELOBI NKOLO. Pe nazali komiyoka, Nkolo, ete nayebi malamumu likambo nazali kosala.

²³⁵ Na bongo, nabondeli Yo, NKolo, na Nkombo na Yesu, tika ete bato báminingisa, na mpokwa oyo, pe bákima nkanda oyo ezali koya, mpamba te Ikabod ekomami likolo na bikuke pe likolo na bikólo. Elembo ya moindo etiami likolo na yango. Molimo ya Nzambe eyoki mawa pe ekei, bamekami na kilo pe bakoki te. Féti ya Mokonzi Nebukadanesala esalemi lisusu, ná ba-féti ya milángwa pe basi balati bilamba ndambo, bazali komibenga Baklisto.

²³⁶ E Nzambe ya Lola, yókela mokili ya masumu pe libota ya masumu mawa, Nkolo, ndenge tozali na mpokwa oyo. E Nzambe, nazali komeka kotelema na kati-kati, mpo na kosenga mawa ya Nzambe, ete Óloba na ebelé ya bato oyo, na mpokwa oyo, pe óbenga Mwasi na Yo ya libala na bokebi, Nkolo, mpo atambola na elembo ya endimeli moko te, kasi na lokito ya Nsango-malamu ya Nkolo Yesu Klisto. Kokisa yango, E Nzambe. Tika éyébana, na mpokwa oyo, ete Ozali Nzambe, pe Liloba na Yo ezali Solo. Wana, na limemia nyonso, totelemi liboso na bato oyo, mpo na kobenga bango na botósi ya Liloba na Yo.

²³⁷ Na Nkombo na Yesu Klisto, nabondeli mpo na bango, Nkolo. Bamonaki Yo, na ntembe ata moke te, koleka kati na bato na bango koyebisa bango makambo oyo ezali na mitema na bango. Pe Oyebi, Nkolo, makambo oyo ezali kosalema sika-sikawa. Oyebi ete ezali Solo, E Nzambe. Pe nabondeli Yo, na Nkombo na Yesu, tika ete Molimo Mosantu álobela lisusu, Nkolo, pe ábenda kati na eyanganelo oyo, Nkolo, baoyo bankombo na bango ekomámá na Buku ya Bomoí ya Mwana-mpate. Kokisa yango, E Nzambe. Nabondeli na motema na ngai mobimba.

²³⁸ Bato oyo, na ndenge ya mokili, Nkolo, bakoki kokabela ngai mbongo nyonso batikali na yango, mpo na kosunga Nsango

oyo. Bakoki kosala nyonso bakoki kosala. Kasi, E Nzambe, soki ekómi likambo ya kolongobana na Yango, pe kokota kati na Yango, nabondeli, e Nzambe, ete mpokwa oyo ézala ntango oyo Okofuta bango pe Okosopa Molimo Mosantu na Yo likolo na likita oyo. Ézala ntango ya koseka-seka to ya kopumbwa-pumbwa te, kasi ya kolela, kogánga pe kobongola motema, kokanga maseke ya etumbelo, wana tozali komona kosambisama konguluma na nse na biso, na mpokwa oyo. Kokisa yango, Nzambe. Nabondeli na bosembo nyonso, na Nkombo na Yesu Klisto.

²³⁹ Ndeko na ngai mobali pe ndeko mwasi, na—nayebe lisusu te likambo ya koloba, soki nandimami na miso na bino, na nguya na Nzambe, soki bondimaka ete nazali mosakoli na Ye. Oyo nde mbala ya liboso mpo na ngai koloba yango liboso na bato nyonso. Kasi nazali koyoka likebisi moko ya ndenge mosusu. Nazalaka na mokumba ya makambo ya boye te. Boyebi yango. Nasalaka makambo ya boye te. Nazalaki na kiló mpo na koteya Liteya oyo pe koloba makambo oyo. Nazalaki koleka pembeni-pembeni pe nyonso wana, mpo na kosala yango te. Kasi Elobami, pe Ekozala na Mokolo ya Kosambisama, lokola litatoli, ete nalobaki Solo. Ezali YANGO ELOBI NKOLO NZAMBE! . . . ? . . .

²⁴⁰ Oh, ba—Pantekotiste, bókima mpo na bomoi na bino. Bókima mbangu kino na maseke ya etumbelo pe bólela, liboso ntango éсила, mpo ntango moko ekoya, oyo bokolela kasi ekosunga ata moke te. Mpamba te Esau alukaki kozua lisusu esika na ye ya bokulutu, kasi azuaki yango te. Nazongisi bino, oh, Californie. Oh, likita ya Bato na Mombongo ya Litondi ya Nsango-malamu, nalingaka bino, natikaki bino pe nakangamaki na bino, na motema na ngai mobimba, nazongisi bino na maboko ya Yesu Klisto, na mpokwa oyo. Bókima mbangu epai na Ye! Bótika te ete zaboló ásilisa mpiko na bino na Likambo oyo. Bókangama na Yango kino moko na moko na bino ákotondisama na Molimo Mosantu, pe ekosala ete bókoka koya na Liloba oyo, pe bino basi bóbongisa bomoi na bino, pe bino mibali bóbongisa bomoi na bino. Soki olobi ete ozali na Molimo Mosantu, pe oboyi kolongobana na Liloba, molimo mosusu nde ezali kati na yo. Molimo ya Nzambe ezalaka likolo ya Liloba na Ye, Liloba ya Masiya, oyo epakólómá. Mwasi na libala asengeli kozala Masiya ya moke, Liloba oyo epakólámi.

²⁴¹ Tótelema, na Nkombo na Nkolo Yesu Klisto. Soki boyoki lisusu mongongo na ngai te. . . Kasi, soki Nzambe alingi, sima na mwa ba-ngonga, nakokende na Afrika. Ntango mosusu nakozonga lisusu te. Nayebe te. Kasi nayebe bino, na motema na ngai mobimba, nayebe bino Solo. Nabombi koyebisa bino te nyonso oyo Nzambe ayebisaki ngai ete náloba. Pe nalobi Yango na Nkombo na Nkolo.

²⁴² Ezali ntango ya motuya monene. Nayebe te ndenge ya koloba yango. Namekaki kotika eteyelo mbala misato to minei, kasi

nakoki te. Oyo ezali ngonga ya motuya monene. Bóbosana yango ata moke te. Oyo ezali ntango oyo Nzambe azali, ntango mosusu, kobélela mpo na mbala na Ye ya suka. Nayebi te. Mokolo moko, Akobélela mpo na mbala ya suka. Ntango nini? Nayebi te. Kasi nayebisi bino, kokokana na emononeli yango, ezali lokola kotongama ya Mwasi na libala yango ekómi na suka.

²⁴³ Bótala ndenge mangomba ya bibongiseli ezali kokota. Ntango mongondo oyo alalaki ayaki koluka Mafuta, azuaki Yango te. Mwasi na libala akotaki. Konétolama esalemaki. “Wana bakendeki kosomba Mafuta, Mobali na libala ayaki.”

²⁴⁴ Olali mpongi? Lamuka noki, pe zua lisosoli. Pe tóbondela, moko na moko, lokola tolingi kokufa na miníti oyo, na Nkombo na Nkolo. Tika ete moko na moko ábondela na lolenge na ye.

²⁴⁵ Nzambe na-Nguya-nyonso, yókela biso mawa. Nkolo, yókela ngai mawa. Yókela biso nyonso mawa. Ata tosali nini, ntina na yango nini, soki tokweyisami na makambo oyo? Natelemi pe nasengi mawa, E Nzambe, liboso engumba ya motuya oyo ézinda na nse ya mai-na-mbu pe kosambisama ya Nzambe ébeta libóngo oyo. Nabondeli, e Nzambe, ete Óbenga Mwasi na Yo ya libala. Natiki bango na maboko na Yo sikawa, na Nkombo na Yesu Klisto. Amen.



KOPONA MWASI YA LIBALA LIN65-0429E

(The Choosing Of A Bride)

Liteya oyo ya Ndeko William Marrion Branham, eteyamaki liboso na Ngelesa na mwa minei na mpokwa, mokolo mwa 29, sanza ya minei, na mobu 1965, na likita ya Lisanga ya Molóngó ya Bato na Mombongo ya Nsango-malamu Mobimba, na Hotel Biltmore, na Los Angeles, na Californie, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2017 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org